


М 32
27496

А. МАТБЕЕВ

МА
ДА
ГОРМОГ






АЛЕКСАНДР МАТВЕЕВ



ТЕШКОДЬ ВИСЬТЪЯС



Ками книжной
издательство
1964

«Ма да гормөг»—писатель-юморист Александр Матвеевлөн мөдөд сборник. Первой сборникыс «Ме найёс аддзыл»—петіс 1959 воын. Тайё кыкнан сборникас пыртём сатирической да юмористической дженьдыдик висьтъяслөн художественной, идейной подувьясыс откодьюсь. Найё ёся сералёны, дивитёны мяян йёз кост олёмысь тырмытөмторьяс. Писательлөн ёсь перё улё сюрини больгысыс и бюрократьяс, разгильдяйяс и дышьяс, подхалимьяс и «ыджыд» начальникё асьсё пуктысыс, общественной овмёслы да государстволы ыджыд ущерб вёчысыс.

Оти кывйён кө, и тайё бөрья сборникас, кыдзи и первойяс, лонны суйёмаоьсь медся разной темаяс вылө кыпыд, ёсь кывйён гижём висьтъяс.

Лыддысысыс оз каитчы, лыддяс кө тайё сборниксё помъныс помөдзс.

Александр Михайлович Матвеев

МЁД И ПЕРЕЦ

Рассказы на коми языке

Оформление *С. А. Холопова*

Редактор *С. Морозов*

Техн. редактор *А. Вишнева*

Сдано в набор 19|VI-1964 г. Подписано к печати 18|VIII-64 г. Формат 84×108¹/₈ бум. л. 0,937, печ. л. 3,075 (Уч.-изд. л. 2,87). Ц00942. Зак. № 2922. Тираж 2000. Коми книжное издательство. Дом печати. Цена 9 коп.

г. Сыктывкар, Республиканская типография Управления по печати



КЫДЗИ ПАННЫ СЁРНИ

енё ыстисны «Югид лун» колхозо. Мөдөдiс ачыс колхозной производственной управлениеыс парткомса секретарь. Сийо тшөктiс:

— Тэ, Момотов, сэни крепыдджыка дейстуйт. Колхозыд абу аптека. Аптекаад сетан лекарството да юасны көть оз, тэныд веськодь. А колхозад медым миянлысь индөдьяссө олөмө пөртөны. Требуйт, Момотов!..

Кутшөм вөли сикт бердас ывлаыс, ог кут гижны. Писательяс унаысь нин висьтавлiсны, мый небесати ветлөдлө шондi, а ылын лөзалө вөр. Ыб ылын чеччалiсны ракаяс. Налы вөли веськодь, мый öни көдза кезлө лөсьөдчан кад. Пасйи, мый шор бокин туплясьö агас.

А со и кузнеча. Каллянысь моз кайö кизьөр тшын. Колö пыравны, мый танi вөчöны.

Кузнечыс вөли дзик кузнеч кодь — сьөд, ыджыд. Чөвтлiс ме ылө синсө да клөнөбтiс көрт/ торийö сьөкыд мөлөтнас.

— Видза олан! — шыси ме. — Ремонтируйтiн эн на колхозной инвентарсö? Кутшөм показательясыд?

Кузнеч койыштiс ва көшөн горьяс. Кузнечаыс тыри чадөн да руөн. Ме чепөсйи ывлаас. Нөрөвитi, пыри ылысь да горөдi:

— Здравстуйте, кузнеч ёрт! Кутшөма, мися, ремонтто нуодан? Ме представитель!

Кузнеч клёнөбтіс мөлөтнас көрт торйө. Сявкнитисны-ләбисны би киньяс. Ме вылө сөмын букуштычыліс. Сулалышті да петі. Неылын ворсіс детинка, рака поз кодь шапкаас сөвтіс лым. Юалі да детинкайд висьталіс, кызди шуоны кузнечсө. Пыри выльысь.

— Видза олан,— шуа,— Питирим Иванович! Честь труду! Шойчышт да куритчам!

Кузнеч пуктіс мөлөтсө, чышкыштіс пөсьсө, пиньясыс дзирдовтісны. Ме шамырті сылысь кисө.

— Позьө и шойчыштыны!— нюмъялө.

Варов морт вөлөма. Быдтор висьталіс, бурсө и омөльсө. Корис кежавны, кор вола.

Мөдөдчи правлениеө. Юкмөсдорса тьөтөлысь юалі, кызди ним-вичыс колхозса председательлөн, замыслөн, счетоводлөн, бригадирьяслөн, кйдыс складса стөрөжлөн.

Өні төда нин, кызди колө войтырыскөд сёрнисө панны!



МАРЬЯЛӨН ПРЕМИЯ

овхозлөн отделениеса управляющөй Кузьма Иванович Титков локтіс скөтнөй дворө, кытшовтіс гөгөрбок, чукөртіс нывбабаясөс да заводитіс чорыда дивитны өткымыньясөс.

— Марьюш дінті прөйдиті да мөдарө лои бергөдчыны — юрсиыс лөзь, дзик васа беслөн кодь.

Марьюш гөрдөдіс да лэдзис синьяссө, а пөдругаясыс горөдісны:

— Эн серав, нинөм кө он гөгөрво! Өні татшөм и модаыс, «вөв бөж» шусьө.

— Модалы паныд ме ог мун, а юрсиыс кө усьө пөдөнчаас, коді кутас өтвечайтны? Со тай нө Мотя көсасө көлач моз гартөма юр гөгөрыс. Вот кутшөм модаыс колө... Сыысь өтар, чилзанныд мөсьяс дінас.

Кузьма Иванович пөттөдзыс чиршөдліс скөт ви-

дзысьясос турунсö лёк ногон разодомысь. Сийö пер-
йис зепсыс турун клök да быдöнлы вайлис ныр улö-
дзыс. Этатшöм зарнисö пö онö жö убöлитöй коявны,
көть пö öд татшöм көрымсö ачыл сөй, сэтшöм мича
да пötöса.

— Вот, ёртгяс, ме сэсся помала. Зіля уджалöй,
синсыныд би петмөн. Онö кө — чорыда кутам крити-
куйтны. Ми сы вылö мастерось,— курыда нюмъевтис
управляющöй.

— Мастерось тай,— дöзмöмөн шыасис Марья.—
Öти турун клök аддзин да рытывбыд зыньган, а вот
пасибö көть öтчыл висьтавны онö сяммöй, сöмын кри-
тикуйтны кывныд тiян бергалö.

— Меным аттьöсö оз жö висьтавлыны,— вочави-
дзис Титков.— Парткомö корасны да юрси паныдыд
кызди малыштасны, скöвөрöда вылын гыч моз чеч-
чыштлан. Вот тайö критика! А менам öмöй критика?
Сидз прöстö шмонитöм, лыöдз ни вемöдз оз мөрччыв.

Дояркаяс броткигтыр петисны. Найö чувшьялисны,
скöралисны. Öдötтялы кок улас сюри тыртöм ведра
да сийö сэтшöм яра чужйис, мый ведраыс брунöдчиг-
тырйи, гашкö, сикт шөрöдзыс лэбис. Фермаын делöяс
мунöны бура, нывбабаяс сьölöмсяньыс мырсьöны,
йöв лысьтан план тыртöны да вевтыртöны, а Титков-
лы пыр нечесть.

— Тьфу,— сьöлыштіс Василиса,— мися, гашкö,
көть талун ошкыштас-а. Колö эськö управляющöйсö
асьсö öти лун кежлö доддявлыны татчö!

— Кабаланад лöсьыд довъявны!— пузис Марья.—
Ме верма жö папкатö вöдитны.

Титков көть и эз радейт некодöс ошкыны, бур йöз-
тö казялöмаöсь на. Бур славаыд бордъя, сийöс он
дзед. Ферма, кытчö воліс управляющöй, петіс сов-
хозын медводдза местаö, и рабочком шуис преми-
руйтны медся зіль дояркаяссö. Марьялы шуисны сет-
ны шоныд пухövöй шаль. Рабочкомсянь ыстöмаöсь
шальсö отделениеса управляющöйлы, и Титков öтчыл
рытнас пырис Марья ордö.

Кöзйякаыс вöлі гортас, чай юис, корис и Тит-
ковöс пызан саяс. Кузьма Иванович сьöкыда пуксис
улöс вылö, ырситіс блюдйысь пöсь чайсö, мигнитіс
банйöм чужöма мичаник кöзйякалы да шуис шпыння-
лігтырйи:

— А ме тэн козин вайи.

Марья зэв збыльысь чөвтліс карöй синъяссö кыз управляющöй вылö.

— Ме ог гөгөрво, Кузьма Иванович. Менам жö, кызди шуасны, мужик эм.

Управляющöй гөрöктіс, сырмыны кутіс серамысла.

— Тэ чайтан, ме корасьны локті?

— Ме ог тöд мыйла.

— Ме тэн премия вайи. Рабочком премируйтöма. Эк и шаль!

Кузьма Иванович перйис питшөгсьыс тубрас, паськөдіс, павкнитіс Марьялы пельпом вылас небыд шальсö.

— Пух дай сöмын, юсь кодь еджыд, кокни дай шоныд. Новлы на здоровье!

Доярка вештыштіс шальсö.

— Ог босьт.

Кузьма Иванович паськөдіс синъяссö.

— Кызди он босьт?

Марья докнитіс юрнас, дивитöмөн видзöдліс Титков вылö.

— Кызди тэ он гөгөрво, Кузьма Иванович?— надзöник шуалис сійö, а Титков быд кыв бöрын йöжгыльтчыліс.— Мый нö мен гусьöн сетöм премиясьыд? Тэ жö видан да критикуйтан миянöс явö, йöз дырйи, а премия сетан сідз, медым некод эз и тöдлы. Ме кö заслужиті, тэ чукöрт собрание да йöз дырйиыс и мыччы премиятö да висьтав, мыйысь сетінныд. Сэки меным оз ло яндзим босьтны шальтö да нэм кута помнитны, кызди менö аттьöалис народыс. Тайö öд абу тэнад премияыс, а народлөн. Сідзкö, медым народ и сетö.

Кузьма Иванович шöйöвошöмөн бөр идралис шальсö да сибдöм гөлöсөн вочавидзис:

— Вернö, Марья Семёновна. Мыжа. Гөгөрвои...

Регыд фермаын лои собрание. Управляющöй Кузьма Титков сэтшöм мастера ошкана речсö висьталіс, мый öткымын дояркаяслөн весиг синваыс петіс. Со öд пö кутшöма буртö помнитö Кузьма Ивановичыд! Критикуйтнытö көть и кужö, а ошкынытö мастер жö!

А кутшöма швачкисны дояркаяс ки пыдöснаныс, кор Марьялы сетісны пухöвöй шальтö! Көсйылісны

весиг качайтны дояркаӧс, но сійӧ кыкнан кинас кутчысис скамья кокас да эз вермыны торйӧднысӧ.

Кывсӧ, неважӧн пӧ Марья Семёновнаӧс, кызди медбур дояркаӧс, газетын вӧлі печатайтӧмаӧсь. Вот кызди мортыс правдайтӧ народлысь бур кывтӧ.



МЕДСЯ БУР ПРИДАННОЙ

ай дырйи гажа! Тулысыс збо-дермӧдӧ морттӧ. Шмонлив поэт шулӧма, тулыснад пӧ чаг чагкӧд радейтчӧ. Мортыслӧн сӧки, дерт нин, сӧлӧмыс воссьӧ мичаыслы, авъяыслы. Весиг медся зумыш канцеляристыяс тайӧ кадас стӧканъясӧ пуктивлӧны тувсовъя дзоридзьяс да тшӧтӧн гольскӧдчигмоз вомгорулас мургӧны: «Гажа тулыс воис, гӧгӧр жургӧ шор».

Дина Павликова ёна жӧ нимкодясьӧ тулыснад. Бытьӧ бордьяс сӧки чужлӧны сылӧн. Од весиг йӧрын олысь уткаяс май тӧлысьнад видлӧны лӧбзыны, кор еджгов кымӧръяс сайысь кыласны дикӧй пӧдругаясыслысь герчкӧмсӧ.

Дина Павликова абу на пӧрысь утка. Сійӧ — тыр вир-яя верстьӧ пӧтка, позьӧ кӧ дзоридзалысь нылӧс ӧткодявны лӧбачкӧд. Диналӧн бордйыс — сельхозтехникумса диплом. Кольӧм тулысын сійӧс пӧлучитис. Кутшӧм ӧдийӧ лӧбӧ кадыд! Бытьӧ тӧрыт на вӧлі выпускной рыт...

Директор да преподавательяс сиисны выль зоотехникъяслы быд бурсӧ: уна сӧ чипан, порсь, кукань да мукӧд ловъя пемӧс быдтыны, бур уджысь во мысти нин веськавны Москваӧ выставка вылӧ. Дина Павликова тшӧтш швачкӧдис кияснас мукӧдъяскӧд ӧтлаын. Сійӧ збыль чайтис, мый мӧд во та кад сійӧ лӧӧ медся этша вылӧ заслуженной зоотехникӧн. Кызди нӧ мӧд ногӧн, мыйла нӧ сідзкӧ велӧдчис?

Олөмыс ворсө мортыдкөд. Коді нө вермис мөв-пыштлыны, мый Дина сідзи оз и воськовтлы колхозной картаяслань. Төлысь-мөд гортас оліс, сэсся думыс дзикөдз вежсис. Өткымын нывъяслөн мөвпыс өд тувсов поводдя моз жө вежласьө: сөмын на вөлі жар, а со көдздөдіс нин. Сідз жө и фермаыд вуні Диналөн.

Неважөн корлісны сійөс өти комсомольскөй учреждениеө, медым критикуйтыштны. Чукөртөмаөсь сэтчө кызь кымын нылөс да рытывбыд найөс янөдісны:

— Ті пө, сэтшөм-татшөмъяс, сельхозтехникумын велөдчинныд да уджавны колхозын да совхозын онө көсийй! Көні тиян сөвестыныд?

Дивитысьяс висьталісны налы уна нывъяс йылысь, кодъяслөн мича славаыс паськаліс нин быдлаө. Өтияс уна йөв лысьтан фермаясөн веськөдлөны, мөдьяс велалөмаөсь утка-дзодзөгъясөс рөдмөдны. Ошкисны кукуруза быдтысьясөс, свеклө дөзьөритысьясөс.

— А ті мый вөчинныд бурсө, кокни нянь сөйысьяс?

Кокни нянь сөйысьяс гөрдөдісны сэтшөма, быттьө сөмын на петісны жар пывсянысь. Вочавидзны вөлі нинөм. Быдөн вөлі меститчөмаөсь кокни местаясө: коді пивной ларөкын вузасьө, коді контролөралө кинотеатрын, а коді и паркын стөрөжалө. Найөс магнитыс эз кыскы сиктө. Мөдарө, сиктыс повзьөдліс.

Дина гөрдөдыштліс жө, но эз нин сэтшөм өна. Сылөн сөвестыс, тыдалө, узис. Ыджыд лыска синьяснас гусьөник унаысь кыйкнитліс комсомольскөй руководительскөд орччөн пукалысь шөр арлыда мужичөй вылө. Сійө приметитіс мужичөйлөн костюмысь өти кызь.

Кызь кызь и эм. Торъяліс мукөдъяссыс сөмын сійөн, мый сійөс вөлі вурыштөма еджыд сунисөн. Суниссө краситөма съөд карандашөн, медым эз төдчы.

«Гөтыртөм тай, буракө!— долыда чуймис Дина.— А ачыс өд ещө Академияын пө уджалө, уна деньга кульө!»

Петігас Дина веськаліс «академик» дінө. Варовмисны. Тыдовтчис, мый мужичөйыс — наукаяс кузя кандидат да уджалө, сылөн сөрни серти, зэв важной проблема вылын: төдмалө, кутшөм пөльза вермасны сетны турияс видз-му овмөслы.

Колө-ө висътавны, мый кандидатлы зэв ёна кажитчис диплома нылыд? Велөдчөм морт радейтө велөдчөмаос, медым гозъялөн вөлі өткодъ «уровень». Нинөмла содтыны, мый неважөн найө ветлісны карса выль загсө, кодос мөд ногөн нимтөны гөтрасян дворецөн. Сійө дворецас сетөны тшөтш и юксөм йылысь кабалаяс.

Дина төдө, кутшөм сійө ыджыдтор верөс сайө мүнөмыд. Өні өд некод нин оз лысыт сійөс укөрайтны сиктө мунны өткажитчөмысь.

Павликова коддьөмлы дипломыд — медся бур приданной. Сійөс өд медся сьөкыд шедөднытө. Самөвартө да эшкынтө позьө магазинысь ньөбны, а дипломтө он ньөб!

— Зэв бур, мый менө корлісны критикуйтны, — шулө аслыс Дина. — Эз кө корлыны, ме, гашкө, кандидаттө эг и аддзыв. Бара эськө өтнамлы ковмис тулыссө колльөдны.



МЕ ДА СУСЕДЪЯС

Меным сетісны патера ыджыд керкаысь. Весиг ванна эм. Өні ме кино ни театрө ог ветлы, быд рыт купайтча. Жаль, мый абу лөсьө-дөмаосъ сэтшөм кран, кыті эськө сур визувтіс. Сэки позис ещө на лөсьыдджыка овны.

Выль керкаад весиг коридорыс дзирдалө. Өти-тор омөль — сәті сусед ветлөдлө. Кыдзкө, гашкө, төрам. Өшөдім кык мыссян доз.

Петі өтчыд, а менам мыссян дозйө папирос шыбитөмаосъ. Дерт, сусед тайөс вөчис, сійө куритчывлө. Ме нарошнө ньөби папирос, көть и ачым ог куритчы, да чөвті быдса пачка Питирим Ивановичлы мыссян дозьяс. Колө велөдны сэтшөм-татшөмъяссө.

Водзөссө сусед чегис менсьым көрт коколюка. Ме гөтырыслы мича сумкаас ловъя шырпи суюи. Мед чилзыштас Евстолия Васильевна!

Та бөрын сусед меным улөс пыдөсө көрт тув тувъялөма вывлань йылөн. Пуксис сэтчө тьөщаой, чеччыштлис пөтөлөкөдзыс, ёрис менө да пышйис ме ордысь. Көсийс эськө суседыд лектор вөчны, а буртор меным лои!

Та пыдди ме сылысь шапка пыдөссө саён мавти. Шапкаасис, мунис удж вылас. Ок, көнкө, и сералисны жө учреждениеса йөзыс сылөн саось плеш вылө!

Сусед таысь менө судө сетис. Гажтөм лои гортын овны. Кык лун нин ваннаын эг купайтчыв. Пола, лэдзас ещө сэтчө Питирим Ивановичыд кутшөмкө зелля.

Гөгөрвои, мый колө вөчны. Ачым ысті сусед да суседка вылө судө норасьөм. Сьөкыд на лоө менө судитнытө!

Корисны общественной судлөн заседание вылө. Локтөмаось и Питирим Иванович Евстолия Васильевнакөд. Пуксьөдісны ставнымөс орччөн, юасисны, янөдісны. Грөзитчисны ставнымөс вөтлыны патерасьыс. Повзим, сетім кыв бура овны.

Рытнас кори суседьясөс чай юны. Дыр варовитім. Евстолия Васильевна сьывны горөдіс, ми Питирим Ивановичкөд тшөттш буксім-отсасим.

Талун кутам чай юны суседьяс ордын. Аддзылі, и курыдтор вайисны!

Бурджык овны бурөн. Свет вылас өд өтчыд олам. Сідз өд?



МОРАЛЬ ДОРЙЫСЬ

Менө бөрйисны парторганизацияса секретарөн. Примиті папкаяс, суюи көрт шкапө. Öні ме сідзи уджсө котырта, мый ставөн шензыны кутасны. Төда, мыйсянь колө заводитны.

Мукöд секретарьяссö критикуйтлісны сысы, мый найö сöмын план да техника вöсна тöждысылісны. Главнöйыс — абу сійö. Главнöйыс — мораль. Мораль кузя кö гөгөр шань лоö, сэки и планыд тырö. Босьтча мораль ёнмöдны.

Талун контораын статистик Африканский да планöвик Диана Эрнестовна воча нюмъялöны. Мыйла найö нюмъялöны? Тані мыйкö эм. Меным тай нö некод оз нюмъяв!

Удж вылысь мунігөн вöтчи на бöрся. Саялісны пельöс сайö. Öдйöджык вöтöді... Африканскийыд кос гөгөрыс кутöма Дианатö! Кыкнанныс сералöны!

Аскинас кори ас дінö найöс, юалі тöрытья кутчысылöм йывсьыд.

— Ме вильді, а сійö кутыштіс, медым эг усь,— паськөдіс синъяссö Диана Эрнестовна.

Кужö öд пöръясьнытö!

— Дугды, секретарь, сөрнытö,— зумыша вочавидзис статистик да вешйис.

Ог жö сөр, кор аслам синмөн аддзылі! Тшöкті стенгазетаса редакторлы кыкнаннысö рисуйтны газетас. Но и теш вöлі! Контораса войтыр ёна и сералісны. Диана Эрнестовна йöжгыльтчис пызан сайö да эз и петав. Синъясыс гөрдöсь, бöрдыштöма, тыдалö. Но и мед, сідзкö, мөрччис критикаыс.

Ме дінö локтіс планöвиклөн верöсыс, көнкө пö шофөрөн уджалö. Ёна скöрмöма гөтырыс вылö.

— Ме,— грöзитчис сійö,— лым толаö гөтырöс пуксьöдла, мед ыркалыштас! Видзöдтö, Африканскийкөд кутчысылö!

— Оз позь,— шуа,— вежөгтыны. Вежөгтöм — капитализмлөн коляс. Мед буржуазия вежөгктö, а тэныд абу лöсьыд.

Шофёрыд пинясигтырйи и муніс.

Воліс и Африканскийлөн гөтырыс. Бөрдö, юксьыны кöсйö да мамыс дінö мунны.

— Эн шогсьы, гражданка,— шуи сылы.— Африканскийтö собрание вылын дзужалам да мöдысь оз кут кутчысылыны.

Собрание вылын йöзыс вөл уна. Прамöя юасисны, пöттöдзныс. Став вопросьяссö вайöдны абу и лöсьыд. Стөрöж Педөр куимысь юаліс, окасьлінныд пö энö. Африканский пыр соссис. Но и ыръянитысь морт!

Выговорто век жö шняпкисны.

Кöсийм и Диана Эрнестовнаöс петкөдлыны йöз водзын, но пышйис сийö удж вывсьыс. Мөд карö му-
нис. Абу жаль миянлы моральтöм войтырыд.

Газетъясын петисны юксьöм йылысь юörьяс. Юксьöны Африканская — Африканскийкөд. Со кызди налөн моральыс киссис! И кызди ме, секретарь, та-
тшöмторсö лэдзи?

Талун казяли — стөрöж Педөр шпыннялö курьерша Маланьякөд. Гашкө, и налөн моральыс дзугсьыны заводитöма? Лоö рытнас кыйöдыштны...



СЫЛЫСЬ НЫВ

«арма» совхозысь парткомса секретарь Василий Князевöс критикуйтисны пленум вылын. сысысь, мый совхозас личалöма агитмассö-
вöй уджыс. Князев шуис веськөдны öшыбкасö, öдий-
джык бырöдны тайö тырмытöмторсö.

«Медым көть фермаын газет лыддисны. Көдöс, эськө индины агитаторнас?» — мөвпалис сийö. Сылы уси дум вылас, мый öтчюд клубын сылөн празднич-
ной доклад бöрын некымын сыланкыв сылис счетовод Тамара Кустова. И лöсьыда сылис.

«Тыдалö, активной», — мөвпыштит Князев. И ре-
гыд Кустовалы сийö тшöктис ветлыны фермаö выль газетъясөн. Сийö эз öткажитчы, кутис волевлыны до-
яркаяс динö.

Звөнитисны öтчюд Князевлы «вылисянь», стрöга юалисны:

— Мыйла оз уджав веж пуясöс дорйöм кузя комиссияыд? Эмöсь стöч лыдпасьяс, мый тиян посёлөк-
ын көзаяс вильöдöмаöсь нин став пуяссö.

Князев улöс вывсьыс кыпöдчылöмөн вочавидзис, мый талун жö коряс комиссияса выль председа-

тельос. Тамара Кустоваос, кызди медся активнөйос, вөлі корөма беседа вылө. Сийө сөгласитчис видзөдны веж пуяс бөрся.

А вот кодос бөрийны печать разөдысьон? Тайө уджыс кыв кутана жө. Зайчихинлөн кольөм воын немтор эз артмы, сы бөрын Петушков сідз жө эз сяммы тыртны газет разөдөм кузя плансө.

«Индам Кустоваос,— мөвпыштіс Князев,— сийө активнөй да дисциплинированной». Тамара Кустовалы вөлі сетөма союзпечатьлысь квитанционнөй книжка.

— Оні менам став важнөй участокьясас лючкиладнө,— шуис аслыс Князев.

Нем виччысьтөг сы дінө локтіс клубса заведующөй Федя Тарабукин. Сийө кутіс норасьны, мый Тамара вывті уна уджыс вөсна эз кут волывлыны хорөвөй кружоклөн занятиеяс вылө.

— Но и мый?— букуштитис Князев.— Мый сийө сьылөмыд? Сьылөмыд сийө — коймөд степеня делө! Сьылөмсьыд менө пленум вылын оз ошкыны ни выговор оз шняпкыны.

Клубса заведующөй заводитліс висьтавыны секретарлы художественнөй самодеятельностьлөн ыджыд төдчанлун йылысь, торйөн нин көсийс пасйыны, мый сьылөм кыпөдө уджалысь мортөс, но секретарь орөдіс сылысь сёрнисө:

— Миян уджалысь морт и сідзи кыпыда олө. Менам отчөтъясын абу сьылөм йылысь графаыс. Эн мешайтчы, ог эшты!

Василий Князевөс корисны республикаса столицаө конференция вылө. Помасьөм бөрас гажая мичмөдөм сцена вылө кайисны сьылысьяс да йөктысьяс. Залас пукаліг парткомса секретарь чуймөмөн чышкаліс өчки стеклөяссө. Сцена вылын сьөд шөвк платтьөа дзирдаліс аслас ныв мичлуннас Тамара Кустова. А кызди сийө сьывны горөдіс! Йөзөн тырөм залыс дугдіс весиг ловавыны, сэтшөма кывзіс мича гөлөсөн лывкйөдлөмсө.

Концертис помасис. Дыр на нимкодя аплодируйтисны видзөдысьяс. А сэсся лои дзик виччысьтөмтор: Василий Князев дінө локтіс ачыс обкомса секретарь да крепыда кутліс сылысь кисө.

— Молодеч, Василий Семёнович!— шуис сийө

нюмъяліг.— Вот тайо партком! Видзодлы, кутшом талантливой артисткаос быдтома!

Князев шойовошомон нюмъяліс. Сийо одва путмис вочавидзны:

— Тайо верно... Сийо бур сылысь... И мян партком, дерт, сылы отсаліс. Кыдзи но!



ТЕЛЕФОН ДОРЫН КАТЯ

ургоны телефонной проводьяс, найо нуоны правдасо и ложсо, строг начальственной бас и правдайтчана вoснн голoсьяс, радейтысьяс-лысь мелі кыв-вор и кодзыд деловой сeрнн.

Телефонистка Катя вугралo коммутатор дорын. Вой нин, важон нин oвсисны учреждениеяс. А со кодкo бара шыасис. Кодлoнкo и оз узьсы.

— Алло! Расово!— кылo мужичой голoс.

Катя шыасис.

— Меным колo совхоз отделениеса управляющей Размыслов.

Катя тодіс голoссo. Тайo производственной управлениеса начальник Спирин.

— Дзик пыр чуксалам, Семён Михайлович!— гажая вочавидзис Катя.— Алло, алло, квартира...

Шыасис oд Размысловыд, коть и крепыда вoлі узьo.

— Ме тайo, коді корo?— юалис сийo кирган голoс-нас.— А, Семён Михайлович! Да ті гораджыка! Ог oд велав!

— Иван Федуловичлы пель вылас ош тувчылo-ма да омoля кылo!— нюмъялігтыр висьталіс Катя.— Размысловыд кык ош нeмнас чергoдлoма, а коймo-дыс асьсo oбидитoма.

— Но, сідзкo, тэ, нывка, сылы висьтав, мый оз гoгoрво. Алло, Размыслов eрт, кутшoма oні арнас мoсьястo видзанныд?

Размыслов кызѳктіс, буракѳ, балябѳжсѳ гыжйыш-тіс да вочавидзис:

— Ничево видзам. Қѳрым тырмѳ на. Вердам и юкталам. Нинѳмысь на ѳбижайтчынысѳ налы.

Катя гѳрдѳдіс да шыасис:

— Пѳръясян тай, Иван Федулович!.. Семѳн Михайлович, зѳв омѳля видзѳны, дзик збыль, омѳля. Мѳсьясыс тшыгѳсь, лун-лун баксѳны. Рѳспута кеж-лас турунсѳ эз вайны да ѳні тьѳтѳясыс нѳбийѳн кыскалѳны.

— Со кызди!— Семѳн Михайловичлѳн гѳлѳсыс чорзис жѳ.— А ноко юав, мыйла сідзи?

— Арнад нѳ тайѳ дивѳ али мый?— правдайтчис управляющѳй.— Тѳ эн шогсы, Семѳн Михайлович, кѳсйысьѳмтѳ тыртам, кык тысяча куимсѳ килотѳ сетам. Мед му пырыс муна, медым шѳри ора, огѳ кѳ сетѳй!

— Эн пѳръясь, эн мудерит!— горѳдіс Катя.— Мый тѳ, Педул Иван, ылѳдчан! ѳні позьѳ пуд йѳлѳн быд мѳслысь лысьтыны, а мян джынсѳ оз сетны.

— Мыйла нѳ турунсѳ мѳдлапѳвсьыс эн вуджѳд, Размыслов ѳрт?— юаліс начальник чорыд гѳлѳсѳн нин.

— Баржасѳ эз сетны,— вочавидзис Размыслов.— Ме ѳмѳй мыжа?

— Мыжа!— ярскѳба содтіс Катя.— Размысловыд ѳні вежон гуляйтіс.

Размыслов скѳрмис жѳ, буракѳ. Сійѳ ѳрччыштіс да горѳдіс:

— Семѳн Михайлович, сет вѳля меным висьтавны, дугѳд Катясѳ! Кутшѳм тайѳ сѳрни, мыйла сійѳ суитчѳ?

— Э,— серѳктіс Спирин.— Нывкаыс молодеч! Не кѳ сійѳ, тѳ менѳ эськѳ бара пѳръялін. Аски жѳ ме мѳдѳдла тѳ дінѳ инспекторѳс. Колѳ тѳ вылѳ прамѳя видзѳдлыны! А тѳ, Катюша, молодеч!

— Век ме дырйи звѳнит, Семѳн Михайлович,— нюмъялігтыр вочавидзис Катя.— Ме ставсѳ тѳда, ачым фермаас волывла. Меысь правдатѳ он дзеб.



СУДЫН

Е сь синъяса судья Рычков видзодліс стен бердын пукалысь тыётö вылö да юалис сылысь:

— Сідзкө, игналін? Йөртін фермаса завсө?

— Йөрти! А мый, йөрти и эм!— пружина моз веськөдчис тыётö.— Ог соссы! Колөкө ещö на йөр-та, мөдысь!

Судья грөзитыштіс сылы чуньнас.

— Оз позь! Йөртны мортөс либö арестуйтны право сетöма сöмын государстволы. А тэ мый та вылö висьталан?— судья юалис пеля шапкаа латшкөс мужичöйлысь, коді пукаліс ськөд орччөн.

— Игналіс,— ышловзис мужичöйыд да пөрчис шапкасö.— Игналіс менö, öкаяннöйыд. А тöдан он, судья ёрт, сэтөн пуксынысö весиг некытчö, кос местаыс абу. Войбыд войтва вияліс. Талун со уджавны ог вермы, кызөдö да несйөдлö,— мужичöй чышкис нырсö сера чышьянөн.— Накажит сійөс, судья ёрт! Быдөн кө менö кутасны картаясö игнавлыны, кытчö ме воштыся?

— Ме сöмын ог гөгөрво,— юалис судья,— мыйла тэ, гражданка Панюкова, порсь картаас тайöс игналін?

Тыётö яра бергөдчис судьялань.

— Муравьёвсö?— нöшта ёна пузис Панюкова.— Да тайö Муравьёвсö колö домавны порсьяс дінас да сэні и видзны! Да некор не лэдзлыны! Қымынысь ме шулі, мися, карта вевтсö колö вевттыны. А сылы веськодь! Оз на пö, шуö, сэтшöм ёна вияв, мөд во пö дзоньталам. А öні, ноко, Муравьёв, висьтав, кутшöма виялö? Висьтав, ноко, висьтав, виялö оз?

— Збылысь виялö картаыд?— стрöга юалис судья фермаса завлысь.

— Да оз нин сэтшöм ёна вияв! Часөн, шуам, витквайт войт усьö, сысыс унасö оз. Юр пьдөс вылö эз и төпкыв, дзик со кос.

— А паськõмыд аслад дзик ва, быттьõ кõвтõмыд!— Панюкова тракнитис Муравьёвõс.— Со кутшõма кõtасьõмыд, медым тэнõ трасича босьтае! Порсьясыслы кутшõм сэнi красуйтчынысõ нюрас? Висьтав!

— Мый висьтавнысõ?— дорйысис Муравьёв.— Порсьыд порсь и эм!

— Абу сiдзи,— судья котшнитис пызана с карандашна с.— Тэ, кызди фермаса заведующõй, обязан лõсьõдны скõtлы став условие. Ме аддза, мый тэ лёка руководитан.

— Некедзи оз руководит! Нинõм оз вõч, дыш Парпõнь кодь!— Панюкова ырыштчис Муравьёв вылõ:— Ук, сетышта нырад, яндысьтõм бугыль!


— Вот мый,— шуис судья.— Кõсьян кõ тэ, гражданин Муравьёв, медым судитим Панюкова ёртõс, ми сылы сетам медся уна вылõ порицание, а тэнõ ковмас кыскыны кыв кутõмõ.

Муравьёв кыпõдчылис судья пызан динõ, босьти шыõдчõмсõ.

— Оз ков судитны Маланьясõ, ме сийõс прõстита,— фермаса зав полiгтыр кыйкнитлис Панюкова вылõ.— А ме тiянылы, судья ёрт, сета кыв, мый аски жõ заводитам картасõ вевттыны. Энõ тõждысьõй. Ме гõгõрвои, исправитча.

— Верманныд мунны,— шуис судья.

Петiгас Муравьёв полiгтырйи видзõдлис Маланья вылõ да тõвзыштитис сы дiнысь.



ВЫЛЬ САДИК

икõ менõ воштитисны посёлõкса нывбабаяс. Паныдасясны туй вылын да пыр и топõдасны...

— Ми тэнõ депутатõ бõрйим, а тэ асьыд кывтõ вунõдин? Пõръялин, сiдзкõ, миянõс. Кõни нõ садикыд?

А мый эськө налы вочавидзны? Наказ вöлі садик восьтыны. Ме, кызди райсöветса депутат, собрание вылын шулі:

— Ичмоньяс, ме, кызди олöма морт, гөгөрвоа, мый детскöй учреждениетöг ни удж вылö мунны, ни пальöдчывны петавны. Гөгөрвоа, мый бöж дораныд кагаяс öшöдчöмаöсь. Медым ме му пырыс и ва пырыс муна, ог кө тiянылы садик лöсьöд!

А кызди лöсьöдан? Совнархоз көть и та вылö деньгасö сетiс, но леспромхоз оз стрöит. Лежневка, шуöны, колö? Қолö. Мастерскöй колö? Қолö. А садиктöгыс пö тай важөн бабаяс кызкö овлöмаöсь дай öнi оласны.

Воис лесопунктас выль начальник Оверин ёрт. Ме — сы дiнö.

— Кутшöм,— шуö,— садик! Меным кубик колö.

Руководитö Овериныд, кубик перйö, но и стрöитчыны заводитiс. Сись кодь керьяс кыскисны медся шыльыд эрд вылас. Багатырьяс-плötникьяс сруб тшупöны, венеч вылö венеч кайö. Нязгö пила, камгö чер. Мойдын моз керка чужи, весиг архитектурнöй излишествоясөн. Лакируйтöм джоджьяс вылас вильдан, вевтыс невесталөн сарапан кодь мича. Öтарсяныс — веранда, мöдарсяныс — терраса.

А материалыс кытысь? Пу и көрт, стеклö и кирпич — ставсö лесопунктысь. Гашкö, мися, садиктöнин стрöитöны?

— Э,— шуöны контораын.— Аслыс, другö, тайö выль керкаыс — лесопунктса выль начальник Виктор Дмитрич Оверинлы. Казеннöй патераыс гöтырыслы абу кажитчöма.

Аттö, шуа, сё морö олөм! А öд öнiя патераыс начальникидлөн чача кодь керка, неважөн капиталнöй ремонт вöлі. Мый эськö сөнi не жыруйтны?

А сэсся кывлі, локтö пö талун мян посёлокö совнархозысь ыджыд начальник. Петi тшötш сийöс встречайтны. Аслам дум юрын вөрö: оз-ö мыйкö артмы?

Ветлöдлö посёлоктi ыджыд начальник аслас свитанас, массаяскöд йитчö. Сы гөгөр посныдджык начальникьяс бергалöны.

Сувтi ме выль керка дiнад да, кор ыджыд морт-ыд матыстчис, чолöмалi сийöс.


— Ме,— шуа,— кыдзи районной советса депутат, косья тиянлы сьолөмсянь ошкышты начальникны-мөс, Виктор Дмитрич Оверин ёртөс. Чуткөй,— шуа,— ёртыс, оз сөмын кубикъяс вөсна зиль, но и уджалысь мортлөн олөм-вылөм вөсна төждысьө. Вот, аддзанныд, челядьлы кутшөм садик стрөитис!

Пыралис виль керкаө ыджыд начальникыд, шуө:

— Правильноя вөчөма Оверин ёртыд. Ошка сийөс таысь! Уджалысь мортлөн кө олөм-вылөм вөсна төждысян, сэки и кубикыд өдийө кутас содны. Пас-йыны колө Оверин ёртөс приказын, сетны премия. А татчө, виль садикас, талун жө общественностьсө, кагаа мамъяссө чукөртлөй, медым асьныс видзөд-ласны, гашкө кыткө колө лөсьөдышты на. И медым мамъясыс быдтасьяссө татчө өдийөджык вайөдөны да катище вылө увйысьны петөны, коді вермө.

Лөзөдіс Оверин ёртыд тайө кывьяссыд, но паныд шыасьны эз лысьт. А ми эгө зевайтөй. Öдийөджык вывеска өшөдім, мый тані детскөй садик, а нимыс «Снегурочка». Регыд сәні челядь кутисны дзользыны гажа расса пөткаяс моз. Мамъяслөн нимкодьясьөмыд вөлі!

А Овериныдлы и важ патераас вывті лөсьыд.



ТЬÖТÖЯС ВУЗАЛИСНЫ

Сидөр Канев сувтіс аслас йөз водзө да шуис пөшти гоголевскөй городничөй моз:

— Ме чукөрти, ёртъяс, тиянөс, медым юөртны: миян динө райцентрысь локтө начальник, окотитө төд-масьны миянкөд.

Совхоз отделенияса веськөдлысь войтыр эз ыш-тыны ни эз повзыны.

— Локтө кө и мед локтө,— дышеника шыасис бригадир Макавкин.

— Ме шуа, колö лöсьöдчыштны!— дözмис гөгөр-
вотөм войтыр вылө Сидөр Яковлевич.— Производ-
ственнойö управлениеса выль начальник, мися, локтö.
Медым эськö ёнасö огö жö яналöй.

— Шылатö мешöкад он дзед,— шуис град выв
пуктасъяс вöдитысь бригадир Öдötтя.— Нелючкиыд
миян додь көрöб тыр, кодi синма, сийö аддзас.

— Нелючкиыд быдөнлөн эм!— скөрмис Сидөр
Яковлевич.— Мед чуньнас чуткö веськыда меным
синмö сийö, кодлөн некутшöм нелючки абу. Колö
начальникиды петкөдлыны и ассыным бурторъ-
яссö.

— Отделениеса войтыр видзöдлiсны öта-мöд выла-
ныс. Полö, тыдалö, управляющöйыд, медым эськö
сийöс оз тодмышкавны татысь. Выль начальникъяс-
ыд сöстöма чышкöны. Быд выль веськөдлысь завод-
итö уджсö йöзöс вежлалöмсянь: тайö мортыс сылы
оз шогмы, эсийö лөк нога...

Канев сеталiс нин индöдъяс:

— Быдөн тi собрание вылын речь висьталöй да
тöлкөн. Миян делöясыс абу нин сэтшöм омöльöсь.
Йöв лысьтан план тыртам? Ме думысь, тыртам. Сi-
дзи и висьталам. Асьныд гөгөрвоанныд. Тiянöс ве-
лөдны оз ков, ставныд нин пöрысь кутшъяс (Канев
нюмдiс). Миянысь омöльджыкъяс на эмöсь.

Сиктса йöз велалöмаöсь нин быд сикас уполно-
моченнойяс да представителъяс дiнö, некодöс нин
наөн он шензьöд. Та вöсна тайö юöрыс некодöс эз
повзьöд, ни эз шызьöд.

Öтнас Канев лöсьöдчис. Корлiс ас дiнас контора-
са уборщицаöс, сетiс сылы деньга да кутшöмкö стрöт
индöдъяс.

Собрание заводитчис индöм кадö, кöть йöзыс вöлi
этша на: сиктад öд часi вылад абу велалöмаöсь
кыйкъявны, ылöсас олöны. Каневлөн доклад бöрын
сёрнитiс бригадир Макавкин да, кызди и управляю-
щöй, сiдз жö медсясö гаралiс достижениеяс йылысь.

— Овмöс вöснаыд ми ёна тöждысям,— сьылiс
сийö.— Рульсö крепыда кутам. Муртса на заводитас,
шуам, кутшöмкö винт личавны, а ми зэлöдам нин.

Бригадир Öдötтя, кодi пукалiс президиумын, сув-
тис да шуис:

— Тöлкыс миян отделениеын абу на...

Сэк сы кок лапа вылө сьöкыд сапöгнас тувччис Канев. Öдötтя виньдылис.

—...abu на, мися, сöмын öткымын лодыръяслөн,— гөрдöдыштöмөн водзö висьталис Öдötтя.— А сідзсö ничево уджалам.

Сёрнитисны сельпоса председатель да пöжарнöй инспектор. Öтиыс янöдис управляющöйöс сыысь, мый порсьясöс сиктын начкалöны да кучиксö оз кульны, а чишкалöны. Мöдыс пöшти час долис тыр-тöм бöчкаяс да потöм насос йылысь.

— Собрание лыддя помалöмөн,— юөртис Канев.— Василий Кузьмич, пыралöй нурьясьыштны. Миян öд тані abu карыд, ресторанад он, небось, мун.

Канев, Макавкин да управлениеса выль начальник пырисны бухгалтерлөн ичöтик жырьö. Öдötтя көть и начальник жö, сійöс эз корны, медым верöсыс эз вежöкты...

Пызан вылын руалисны порсь яя шыд, жаритöм меж яй. Сидөр Яковлевич шкап пыдöссьыс перйис гөрд юра сулея.

— Путкыльтам кө морт вылө стопкаөн, нинöм грекыс оз ло, ёнджыка сёйсяс. Юöй, Василий Кузьмич.

Василий Кузьмич босьтис нин стопкасö, но бөр пунктис. Стен сайысь кылисны нывбабаяслөн гөлöсьяс. Пырисны, кылö, уборщица ордас да варгыны кутисны. Вöсни пöвья стен пырыс ставыс кылö.

— Мудер ручыд, Каневыд начальниктö кызди пөрьялис! Некодлы вомсö восьтыны эз сет.

Сидөр Яковлевич гөрдöдис, көсйис камкнитны стenas утюг кодь сьöкыд кабырнас, но начальниккыд дугöдис.

— Энлы,— шуис сійö,— кывзышта, мый йылысь тьötöясыс варовитöны.

А тьötöяс стен сайын öддзисны.

— Мösьястö прамöя оз сёодлыны — көрымыс abu, вайнысö некодлы, а Канев сöрис, ставыс пö бур.

— Да öд сійö, бабаяс, ачыс картаас, кызди ме помнита, эз на волы, туйсö сэтчö оз аддзы, ылалас!

— Дзик бюрократ дай сöмын!

— Көйдыссö складсьыс гусялисны, а сылы веськодь. Ещö öд рытывбыд долис, миян пö ставыс лючки-ладнö. Кызди abu яндзим!

Сидөр Яковлевич бара чепөсйис, медым нывба-
баясөс ланьтөдны, но начальник сійөс кватитіс ки
пөлөдыс да пуксьөдіс. Ничево пө, мед варовитөны,
пукав.

Дыр на ызгисны уборщица жырйын тьötөяс. На-
чальник весиг блокнот перйис да сэтчө мыйкө зія
пасьяліс. Сэсся чеччис да шуис:

— Со мый, Канев ёрт. Ме көсйи мунны нин, но
кольччыла на татчө.

Сидөр Яковлевич сөмын и букыштчыліс варов-
мөм тьötөяслань.



ЯЛАВИЧ

“Ч арла» колхозса правлениеө
пырис бригадир Арсентий Мишарин, матыстчис
председатель Григорий Крюков дорө, рапортуйтись
салдат моз лэптис кисө чусмөм кепка көзыр дінас да
доложитіс:

— Председатель ёрт, коймөд бригада эштөдіс
силосуйтчөм. Кутшөм лоасны индөдьяс?

— Вольнө, ачым радөвөй,— нюмъөвтис председа-
тель.— Век тэ, Арсентий, шмонитан. Сідзкө, шуан,
эштөдінныд?

— Дас куим траншея тыртім, топыда и веркөсө-
дзыс. Көрым заптім сы мында, мый өні йөвнад өт-
нас мян бригада дзонь карөс вердас-юкталас. А
турунсө кутшөмөс суйим! Парикмахерскөйын кодь
жө дукуис чөскыд.

Председатель кыпөдчис сьөкыд тушанас, топыда
кутліс кисө зіль бригадирлысь да тшөктис счетовод-
лы тайө силоссө пасйыны сводкаө.

— А сводкасө пыр жө мөдөдөй парткомө да рай-
исполкомө,— содтис председатель.— Надейтча, мый

мианӧс эз на удитны пайыны, петам медводдза меса-таӧ.

— Гуяссӧ эськӧ колӧ видзӧдлыны,— гарыштіс счетовод, косіник мужик.

Арсентий серӧктіс, збоя югнитіс чиганлӧн кодъ сьӧд синъяснас.

— Тэ чайтан, пӧръялім? Волӧй комиссияӧн, кӧть малалӧй став гуяссӧ. Тыртӧма, вевтъӧма ставсӧ лючки-ладнӧ.

Татшӧма водзмӧстчӧмысь Арсентий Мишаринӧс да сылысь бригадасӧ ошкисны колхозса стенгазетаын, пасйисны гӧрд пӧв вылӧ да печатайтисны «боевӧй листокӧ». Мӧд бригадаса бригадир Федя Туркин, чим лӧз синъяса зон, кӧть гусьӧн и неуна завидьтіс Мишаринлы, но йӧз водзын сійӧс тшӧтш ошкис.

— Панйис Арсеньыд. Молодеч сійӧ, менӧ бӧрӧ колис.

Федя Туркинлӧн вӧлі тыртӧма нин 9 гу. Лун-мӧд мысти, дерт, сылӧн эськӧ планыс тыри жӧ, но вот тай Арсень тэрыбджык вӧлӧма. Ордйысьӧмлӧн законъяс тшӧктӧны: эн лӧгав тэнӧ пайысь вылӧ, а суӧд сійӧс дай пайы. И Федя Туркин сӧмын и мӧвпаліс сы йылысь, кыдзи ӧдйӧджык да унджык сило-суйтны.

Коли некымын лун. Рытын, кор бригадиръяс век чукӧртчылісны правлениеӧ, Арсентий Мишарин пырис сэтчӧ шемӧсмӧм чужӧма. Синъясыс вӧйӧмаӧсь, нырыс нюжалӧма, лоӧма дзик нин вешалкаса тув кодъ.

— Мый нӧ, чурки буди, лоин, Арсентий?— юалис сылысь Крюков.

— Ялавичӧй воши. Тӧрыт нин эз воли. Гӧтыркӧд корсим да некысь эг аддзӧ. Быттьӧ сылі.

Арсентийлысь шогсӧ быдӧн гӧгӧрвоисны. Важ омӧлик мӧс пыддиыс пӧрӧдистӧй ялавич лӧсьӧдіс, а со вошӧма.

— Кӧинъяс вильӧдісны,— шуис кодкӧ.

— Кӧин гожӧмын оз усылась. Тайӧ, дерт, ош чӧс-масис Арсень ялавичнад.

— Эз-ӧ вӧй кытчӧкӧ?— юалис Федя Туркин.

— Эз,— вочавидзис Арсень.— Гӧгӧр нин кытшовті.

Кутісны гораа мӧвпавны, кытчӧ вермис вошны ялавич. Ӑти шуис, гашкӧ, пӧ шышъяс нуисны да ко-

лõ пыр жõ милицияõ явитны. Мõд раминика гарыштис, мый сылõн том кадõ дедыслõн пõ тадзи жõ чань вошлi да «тõдысь» отсалiс аддзынысõ.

— Корсьны колõ,— чорыда шуис Федя Туркин.— Онi жõ вайõ ставным петамõй.

— Вернõ,— сõгласитчисны мукõд.

Ставõн, кодi вõли правлениеын, петисны ывлаõ. Куш плешнас югъялиг председатель индалiс, кодлы кытчõ мунны, кытi кытшовтны. Ставõн разõдчисны. Июнь тõлысьын войясыд югыдõсь, ем кõ туй вылас уськõдан, и сйõ сюрõ. Куканьтõ, дерт жõ та мынданад аддзасны, сйõ õд емсыд век жõ ыджыд-джык.

Ачыс председатель пуксис правление бердын сулалысь пес чурка вылõ да пестис чигарка. Сйõ кольчис координируйтны действиеяс, нуõдны общõй руководство.

Сõмын на Крюков ёрт õзтис коймõд чигарка, а кодкõ, кылõ, кашкигтырйи зев тõрыба локтõ. Тайõ вõли Федя Туркин: синъясыс каньлõн моз виж биõн югъялõны да пиньясыс жервидзõны.

— Аддзи ялавичтõ!— горõдис сйõ ылисянь на.

— Кысь аддзин?

— Ог на висьтав. Ветламõй да асьныд аддзанныд. Сõ чудеса дивõыд тай эм!

Федя Туркин нуõдис председательõс сикт сайõ. Рõч йылын кышакылисны бадьяс. Сõй гõрбнысõ чургõдõмаõсь силос траншеяяс. Оти гу жермунõма осьса вомнас. Тыртлõмаõсь жõ гусõ, но киссьõма. Чурвидзисны вõсньыдик потшьяс, бадь росьяс.

Туркин локтис гу вом дорõ, индис чуньнас увлань:

— Со ялавичыс.

Сьõд сера ялавич куйлис траншея пытшкын да гажтõма дзоргис йõз вылõ. Буждõма, коньõр, гуас, личкõма вевттьõдсõ аслас сьõктаõн.

Председатель зумыша видзõдис джынвийõ тыртõм траншея вылõ, сõссия юалис:

— Сидзкõ, пõръялис Ареснийыд? Тырттõм гусõ вевттьõма?

— Ачыл аддзан, председатель.

— Мися, мыйкõ жõ кольõм во силосным эз тырмы! Сводка серти Арсеньлõн вõли шензьымõн уна, а регыд и быри. Но и Арсень!

Ялавичёс, дерт, кыскисны. А сэсся восьталісны Арсень бригадалысь став силос гуяссё да поводнёя на лои найёс тыртавны. Ок, и веськалі жё Арсеньлы!



ӨДӨТТЯ ВЕНИС

Грошев да Грошев — зэв лёсялысь суседьяс. Найё лёсялёны ёнджыка гоголевскöй Иван Иванович да Иван Никифорович серти. Отлаын чай юлёны, отлаын кöзаяснысö йирөдöны. Частö варовитлёны быд сикас философия йылысь. Тöлысьтö да Марстö казътывлöны, космическöй делöясөн бура тöдсаось.

— Марс вылад сынöдыс эм, а Венера вылын öд-вакö,— шуас Грошев.

— Чöv, другö!— вочавидзас Трошев.— Венера вылад сынöдыс унджык да сэнi весиг пуяс быдмöны. Эн вензы, ме стöча тöда!

Аддзанныд, збыльысь культурнöй войтыр. Но вöv нель кока, да и сийö джёмдывлö.

Грошевлөн висьмис рушкуыс. Рушку, кызди тöдса, висьмывлö уна помкаяс вöсна: вывти уна либö вывти этша сёян, пузытöм ва юан либö шоммём шыд панялан. Докторьяс бура тöдöны, мыйла висьмывлö мортлөн грешнöй рушкуыс. Но Грошев эз мун доктор динö. Сийöс лечитны тэрмасьöмөн оттшсьöдис Öдөття пöч. Йöзлөн висьöм — пöчлы прибыль, мыйкö век сетыштасны.

— Пывсыны колö тэныд, дона пи,— вашкис Öдөття пиньтöм вомнас.— Пывсяныд, зөлöта, медся бур лекарство.

Пывсянысь омöльыд, дерт, абу. Петис пывсянад Грошевыд, а Öдөття бара вашкö:

— Тшыкөдöмаось тэнö, зөлöта пи, эскы пöрысь мортыслы. Пывсянсьыд петигад кодкөд паныдасян, сийö и тшыкөдис.

Грошев эськө и вежөра морт, а пель бокнас кыв-
зё. Пывсис, мыссис, петіс, а паныдөн — Трошев локтө.
— Лёгким паром!— шуө.


Грошев воча мыйкө нурбыльтіс, пырис гортас.

Тоткис да тоткис Öдөттяд, усьөдіс өд Грошевтө
Трошев вылад! Лөгасисны другьяс. Грошев научной
подув корсис.

— Öні,— шуө,— учёнойяс висьталөны, мөвп пө
позьө проводтөг да радиотөг вуджөдны сё километр
сайө да ки пьдөснад лыддысьны, куньса синмөн.
Гашкө, регьд кутасны висьтавыны, позьө пө и мортөс
тшыкөдны некутшөм зеллятөг. Гашкө и, збыль мый-
кө вөчис Трошевыд...

И öні лөгалөны. Чай өтлаын оз юны, көза оз
видзны, весиг оз варовитны.

Кьдзи аддзанныд, Гоголь кадсянь мешаниныд
абу на ёна вежсьөма.



УРНЫШЕВ ЛЫДДЬÖ ЛЕКЦИЯ

орней Николаевич Урнышев
воис карсянь Öсек сиктө лыддыны том йөзлы мо-
раль йылысь лекция, велөдны найөс бура овны.

Корней Николаевич чеччис попутной автомаши-
наысь сиктса столөвой дорө. Медводз, дерт, колө
өбедайтны. Юрьд бура уджалө сэк, кор кынөмыд зэ-
лыд. Тшыг кынөмнад ывлаыс весиг гажтөм.

Столөвойын некод эз вөв. Кудель кодь юрсиа
вөсни буфетчица мыччис Урнышевлы шьд да гуляш
вылө чекьяс, сэсся бөр босьтис найөс, пырис кухняө
да петкөдіс руалысь сёян. Урнышев заводитис тэр-
масьөмөн панясьны. Зэв окота вөлі көть мыйыськө
крукасьыштны буфетчица дінө, но дум вылас уси,
мый сійө лектор, кодлы талун ковмас мыськовтны
речь уна йөз водзын.

Сійө төдіс, мый лекциясө колө йитны сиктса
олөмкөд, вайөдны местной фактьяс, медым сёрниис
лои конкретной. Но кытысь босьтан местной факть-

яссө? Гашкө, колхозса да сельсоветса председательяс юртасны мыйсюрө, но öнi найöс öмöй аддзан.

Кадыс вöли рьтъявыв нин. Гөрдов шондi дзоргис лекторлы чай стöканас.

Столövöйö пырис руд дөрöма, руд гача, руд юрсиа кутшöмкө дядьö. Кажитчис, мый тайö мужикыс дыр олöма шондi водзын да чусмöма. Сöмын синъясыс сылөн вöлины зев вöрысьöсь, быттьö синкым улас пукалисны кык пышкай да öтарö чеччалисны. Сидзи и чайтсис, мый дядьöыс аддзö не сöмын водзсьыс, но и бөрсьыс.

Сийö сюся кыйкнитлис гөгөр, шуис «чолём» да пуксис Урнышев пызан сайö.

— Карса морт?— синсö читкыртлис сийö.— Мися жö, тöдтöм. Кутшöм могөн миян местаясас?

— Сидз тай локти,— дышиника вочавидзис Урнышев. «Вина румка, көнкө, кыйöдö»,— мөвпыштис ачыс.

— Командировочной? Сидзкө, тöдмасям. Ме пенсионер Кутькин, Егор Иванович. Гражданской войнаса герой.

Кутькин чургöдис кисö. Корней Николаевич уважительнöя шамыртлис сылысь кузь чуньяссö. Кутькин копыртчыштöмөн юалис:

— Тэ öмöй ме йылысь эн на кывлы? Менö район пасьталаыс и кузьталаыс быд пон тöдö. Ванька Егор йылысь юав, быдөн тэныд висьталасны, кодi ме сэтшöмыс. Воюйтли Деникинлы, Колчаклы паныд, батько Махноöс весиг нöйтли. Муртса сийöс эг кут. Шошаöдыс нин кватитли, но удитис, чөртыд, пышйыны Румынияö...

Кутькин сералыштис да висьталис водзö:

— Ме танi коркө öтнам колхоз котыртли. Быд совещание вылын пукавлi гөрд пызан сайын... Тэ абу корреспондент? Гашкө, газетö ме йылысь гижан?

— Абу, другö, корреспондент,— нюмъөвтис Корней Николаевич.— Вои лекция лыддыны, тiянылысь юр вежөрнытö югдöдны.

«А мый, тайö заслуженной да варов мортыслысь кө юасыштны? Дерт, висьталас фактъястö»,— мөвпыштис Урнышев да матыстчис Кутькинлань.

— Аддза, Егор Иванович, мый тэ прамöй морт,— мелiа шуис Урнышев.— Висьталышт вай, кызди колхозаныд делöясыс муноны.

— Мунёны, веськыда тювгёны. Первой места перйим. А кызди нё? Кольччыны огё вермё. Ме, шуам, витсё трудодень кульышти. Мукёдыс, дерт, неуна этшаджык, но тожё босьталёны. Кызди лун, сідзи и день.

— Порсь юрыд уна-ё?

— Кыксё.

— Ыжъясыд?

— Куимсё.

— Мёсныд?

— Витсё.

Урнышев тэрыба пасьяліс ставсё, мый висьтавліс Кутькин. А Кутькин век сёрнитіс — зіль войтыр йылысь, Осек сиктса Парпоньяс йылысь.

— Медся зільыс мян Савё Окуль — Окулина Тырбылева. Меным сійё неуна рёдвуж, менам мамой да сылён мамыс кык мам, тыпу, сорси: кык чой. А медся дышыс — Егор Надь. Том дырйи менам пёдруга вёлі да ме сайё эз мун... Век дышодчё. Уджавнытё гаг кодь, а сёйнытё ад кодь.

— Корней Николаевич радпырысь пасйис и тайё фактъяссё: згёдитчас ставыс...

Рытнас клубё войтыр локталісны надзён. Сизим час кежлё морт комын зонъяс да нывьяс чукёрмисны. Найёс, тыдалё, медсясё ышодіс объявление помын гижод: «Лекция бёрын танцы».

— Ёртъяс, кутшёмён колё лоны ёнія мортлы? — тіралан гёлёсён юаліс лектор, чуньсё вывлань лэптёмён. — Вот мый ме та йылысь думайта висьтавны, ёртъяс... Тіян колхозыд озыр... Порсьыд тіян... (лектор кыйкнитліс паськёдом блокнотас)... порсьныд кыксё, ыжныд куимсё, мёсныд витсё. Сідзкё, ті зіля уджаланныд. Вот тайё и главнойыс. Кыз шуласны — сюрёсыс колё лоны зільён. Мёд-кё...

— Корней Николаевич чөвтліс синъяссё том йёз вылё да казяліс: найё мыйлакё шпыннjalёны. А медся водзын пукалысь еджгов нывка весиг пыльсмунісерөктіс. «Вот йёзыд, — мөвпышти лектор. — Местной фактъясыдлы оз эскыны».

Корней Николаевич содтышти гёлёссё.

— Ті, дерт, колхозса йёзтё бура тёданныд, ассыныд чуньяснытё моз. Ме верма висьтавны, коді зіль, а коді и дыш. Коді синсыс би петмён уджалё,

а кодлөн и кыв вылас сідз да тадз, а-дело вылас некыдз.

— Вай, вай, висьтав!— медводдза скамья выв-сянь горөдіс сувтса синьяса зон да серөктіс.

— Висьтала, ёртьяс,— паськөдіс блокнотсө Урнышев.— Тіян эм Савө Окуль... Извиняюсь, Окулина Тырбылева. Зіля уджалө нывбабаыс, молодец сійө. А медся, извиняюсь, дышыс Надежда Егоровна — Ёгор Надьө. Вот, ёртьяс! Первойыслысь бур примерсө колө босьтны, а мөдсө янөдны...

Залын пукалысьяс нюмьялісны, мыйкө шөпкөдісны өта-мөдныслы. Сувтіс еджыд дөрөма гождьялөм чужөма том морт, лэптіс кисө:

— Қора кыв.

Корней Николаевичлөн сьөлөмыс исковтис увлань.

— Лектор ёрт, тэ сорсин,— водзө нуөдіс зон.— Савө Окуль, дерт, бура уджавліс, но сійө кык во нин пөваралө лесопунктын, мөд районын. Верөс сайө мунліс, татчө оз и воывлы. А Надежда Егоровна Куклина — колхозын медся бур порсь видзысь. Неважөн ветліс карө совещание вылө. Зэв абу лөсьыд, мый тэ татшөм мортсө критикуйтан...

Том морт пуксис, но сувтісны ещө некымынөн.

— Мөсным абу витсө, а сө көкьямысдас. Ме ачым пастук, төда.

— Кысь миян куимсө ыжыс? Бөждьяссө кө налысь торйөн лыддыны, сэк, гашкө, и сы мындаыс лоө.


— А порсьяссө, буракө, вуджөрьяснас арталөмныд...

Корней Николаевич видзөдліс то өти вылө, то мөд вылө, эз төд, мый вочавидзны.

— Нинөм, ёртьяс!— шуис сійө да нюмьөвтіс, сёрнисө көсйис бергөдны шуткаө.— Оні тіян сө көкьямысдас мөс, а регыд лоас и витсө.

— Кор лоас, сэки и висьтав!— ярскөба горөдісны том йөз.

Недыр мөмьялөм бөрын турипув рөмөдз гөрдөдөм Корней Николаевич лэччис трибуна вылысь, а сэсса, некодкөд прөщайтчытөг, тэрмасьөмөн петіс клубысь.



СОФЬЯ ФЁДОРОВНА ТШАПМЫЛІС

Меным сетісны патера виль
ыджыд керкаысь. Тайё керкасё стрөитігас на воylv-
лі сы дінё, нимкодясьлі джуджыд кыз стеньяснас,
югыд өшиньяснас да пывсян пасьта өдзөсьяснас.
Вот, мися, оз кө пөръяв горкомхозыд, этайё рөм-
пөштан кодь югыд өшинь саяс ме регыд кута чай юны.

Но воис овмөдчан луныс, көлуй вайим, сувтөд-
лім да өшлим. Мудзтөдз нокси да петі коридорас. Ви-
дзөдлыны окота лои, кутшөм суседьясөс ен сетіс.

Суседьяс сэні нин вөліны. Киаси накөд.

— Монтёр Пётр Петрович Исаков,— висьталіс
ас йывсьыс латшкөс, топыда тэчөм гражданин да
весиг коклябөрьяснас тшолкнитліс, армейскөй при-
вычка сертиыс, тыдалө.

— Сидөр Иванович Касев, инспектор,— вочави-
дзис нюмъялігтыр мөд мортыс да топыда топөдліс
киөс кузь чуньяснас. Сійө довкнитліс юрнас плита
дінын ноксьысь, бобувьясөн мичмөдөм халата ныв-
баба вылө.— Менам гөтыр — Софья Фёдоровна.

— Зэв нимкодь меным,— меліа нюркнитіс Софья
Фёдоровна.— Аддза, ставыс зэв бур суседьяс. Ме
зэв дөвөлен. Матысса сусед пө бурджык ылысса рөд-
няысь. Пыраламөй чай юыштны, дона суседьяс.

Пожъялыштім кынөмнымөс чайөн. Чайыс сэтшөм-
татшөм, виль корөсь көра, а көзьяйкаыс ёна кажит-
чис. Эз сы вөсна, мый мича, а сы вөсна, мый веж-
ливөй, культурнөй, мелі. Қызан, и сэтшөм лөсьыд,
бытьё кокбөрлятө чипан гөнөн гильөдоны. Эмөсь жө
татшөм авъя моньясыд! Став нывбаба рөдыс кө эсь-
кө та кодьөсь! Петігөн ме ёна и аттьөалі сійөс. Весиг
көсий кисө окыштны да эг лысьт, гашкө, мися, ве-
рөсыс кутас вежөктыны да.

Овмөдчим ми куим семья да зілим мед эськө өта-
мөднымлы век бур вөчны. Истөгыс кө бырас Софья

Фёдоровналөн, ми ордö волö водзöсасыны. Миян сов бырас — Касев гозъялысь корлам. Ота-мöдным динö быд здук пыравлам варовитны. Казытылам, мый нин вöчсö мукöд странаясин да петас оз таво солалан тшак — и сьöлём вылад лöсьыдджык лöб. «Аттö,— мөвпыштан,— татшöм бур йöзсö мыйла водзджык эг тöдлы!»

Отчyd посводзын паныдаси Касев гозъякöд. Сидөр Иванович век öткодь, нюмъялö, а Софья Фёдоровна юрсö тшапа лэптыштліс да пинь пырыс «здрасте» сöздöдіс. Ме чуйми. Мый нö, мися, кутшöм гут сійöс курчöма, мыйла лөгасыöма? Кажитчö, некутшöм пакöсть налы эг на вöчлыв: шyd чугуннысö плита вывсыс эг на пöрöдлыв ни рок кашниканыс öшыбкаөн сов эг кисьтлыв.

Суседъясыдлөн лөгалöмыд юр весьтад сім сьöd кымөр кодь, сійö и виччысь — гым гымыштас. Жугла юрс, мыйысь эськö Касев гөтыр лөгасис.

Паныдаси монтөр Исаковкöд, юкси аслам шогөн.

— Софья Фёдоровнаыд эз лөгась,— шуö Исаков,— а тшапмыштіс. Эн öмöй кывлы — сылөн Сидөр Ивановичыс абу нин инспектор, а отделса начальник.

— Со мый! А ме вöлі ог и тöд. А ачыс Сидөр Ивановичыс тай пö век öткодь вежлив да варов?

— Прамöй мортöс кöть министрö пукты, сійö ньöти оз тшапмы.

Софья Фёдоровна эз кут корлывны миянöс чай юны. Синсö чөвтлас вылысад да бытьö тэнö оз и аддзы. Отделса начальник гөтыр оз жö кут кутшöмкö монтөркöд да шофёркöд варовитны!

Шмонитлам Сидөр Ивановичкöд. «Тэ кöть миян дінысь эн öтдортчы»,— шуам сылы. Нюмъялö. Пикö пö вои гөтыркöд, тшöктö пö öчередьö гижсыны да автомобиль ньöбны.

Вежон-мöд мысти монтөр Исаков меным шуö:

— Омöль миян делöяс, другö. Сидөр Ивановичтö öд директорö пуктöмаöсь.

Пыра ме öтчyd гортö, сувтыштлі кильчö дорö. Касев гөтыр пессö вузалö.

— Мыйла нö, Софья Фёдоровна,— юалі вежлиböя,— пестö реализуйтан?

Долыд мыйлакö мортыдлы да нимкодьпырысь жö вочавидзис:

— Миянлы,— шуө,— выль патера сетасны, Сидөр Ивановичыд өд директор нин... Вит комната лоө, ванна, душ, газ. Мый миянлы та мында пессьыс? Бурджык ме автомашина ньоба.

Скөрми ме. Көсийи крапнитны, мися, оз-ө ло выв-тіджык тиянлы, чунь гозьялы, вит комнатаыс. Омоль али мый өния патераыд, көть ти и директор да директорша? Воис кө верөсыд директорө, быть, сідзкө, выль патера колө кватитны? Сөвестьтө оз жө ков воштыны! И нинөм эг шу, сөмын зептын жулакөс петкөдлі. Вома бабаяскөд пинясьом дорсьыд бурджык ошкөд тышкасьны.

Касев гөтырыд көлуйсө ыджыд туюкьясө гартліс, менө корліс отсасьны. А сэсся коркө видзөда да, бөр разялө.

— Төлөдны,— висьталө,— көсья көлуйсө, медым оз бакшась.

А монтөр Исаков меным гусьөникөн шөпнитіс:

— Сидөр Ивановичсө бөр чөвтөмаөсь директорсьыс. Сійө пө бөр нин инспекторалө.

И Софья Фёдоровна бөр сэтшөм мелі лои!

— Локтөй,— шуө өти рытө,— суседьяс, чай юны пыраламөй. Аслам пуөм варенньөөн чөсмөдла. Волөй, волөй!

Пыралім, видлім варенньөсө. Юмов, кывтө нылыштан. А көзяйкаыс нөшта на юмовджыка варовитө.

— Кутшөм,— шуө,— лөсьыд бур суседьясыдкөд! Та вөсна и эг убөлит мунны тайө патерасьыс.

Өні на Софья Фёдоровна миянкөд мелі да варов. Сідзкө, Сидөр Ивановичыс век на инспекторалө.



ВИЗА

ёдор Симпелев лөсьөдчис доклад кежлө. Пызан вылын куйлісны кыз книгагяс, кытысь позьө вөлі гумлавны төлка мөвпьяссө мыйта колө. Профсоюз обкомса войтыр төрыт лунтыр зу-

нясисны-гижисны докладысь торъя юкөнъяс. Фёдор Симпелевлы колö вöлі сійö юкөнъяссö вурлыны öт-лаö, кызди важөн нывъяс посни ситеч торъясысь вурлісны эшкынъяс. Сунисъяс пыддиыс — цитатаяс. Юртö оз и ков жуглыны: часөн-джынйöна докладыд сытöг артмас.

Ковмис бур дояркалөн фамилия. Со, списокын кутшöмкö Любовь Сокерина, быд мöслысь лысьтöма 2960 литр йöв, мукодъсь ёна унджык.

«Сюям сійöс, Любовь Сокеринасö, докладö, вись-талам сы йылысь народыслы», — мöвпыштис обкомса председатель.

Со нин Фёдор Симпелев трибуна вылын. Спокой-нöя, рöвнöй гөлöсөн лыддьö сійö докладсö. Мед кыв-зысьяс оз унмовсьны, корсюрö сійö лэптывлö весь-кыд кисö да чорзöдлö гөлöссö:

— Позор татшöм уджалысьяслы!

Зіля уджалысьяс йылысь кыпыд гөлöсөн шуалö:

— Найö честьөн тыртисны да вевтыртисны! Молодцы!

Доярка Сокерина йылысь минут вит лыддис:

— Любовь Сокерина заслужитис помтöм уваже-ние. Ми ошкам татшöм труженикъяссö. Найö мед-воддза радун мунöны. Найö вердöны народсö йöлөн. Честь и слава сэтшöмьяслы, кутшöм Любовь Со-керина! Кытшавны найöс почётөн, отсавны налы, тöждысьны на вöсна — миян медся ыджыд мог!

Тайö кывъяссö горöдигөн Фёдор Симпелев весиг торйöдчыліс бумагасысь, кыз чуньсö сійö местаас пунктöмөн, кытчöдз сійö удитис лыддыны. Сэсся ба-ра кутис шпаритны докладсö шылъыда, рöвнöя...

Пленум помасис. Ресторанса биллиард кодъ паськыд пызан саяс Симпелев видлалö чöжсьöм бу-магаяс. Гожöм. Джуджыд тополь шпорöдчö коръ-яснас. Кабинетö пырö чöскыд дука сынöд. Петны эськö тась, дзескыдінсьыс. Лэччыны эськö ю дорö, паркö, көні ыджыдалö мелі гожöмыс. Но быть пукав тані öкмыссянь да витöдз... Руководительлы кабинет-тысь лöсялö мунны не паркö, а сöмын мöд кабинетö, ёртъяс дінö шмонитышты-варовитышты либö засе-дание вылö.

Бумага чукöрыс чиніс надзён. Быд кабала колö лыддыштыны — заводитчöмсö либö помсö, а сэсся

пуктыны виза. Сõмын гõгõрвотõм йõз чайтõны, мый виза пуктавны кокныд. Сэтчõ колõ руководительлõн ыджыд опыт. Õти-кõ, мед вõлi тõдчõ, мый визаыс мыйкõ тшõктõ вõчны, а мõд-кõ, сiдзи тшõктõ, мый позьõ гõгõрвоны тадзи и этадз. Мед подчинённõй ачыс башканас мõвпыштлõ, сылы õд ковмас õтвечайтны.

Со совхозысь кутшõмкõ доярка корõ путёвка. Санаторийõ вõзйысьõ, врачяс пõ ыстõны. Курортнõй картасõ тшõтш вурыштõма заявление бердас съõд сунисõн, канцелярскõй скрепкаыс, тыдалõ, абу вõлõма. Лунвылõ окотитõма мунны, Кисловодскõ. Чõртыс тõдõ, кымын путёвка ковмас, быдõнõс кõ мõдõдны лунвылõ да ещõ медся бур кадас!

Фёдор Симпелевлы син улас уси дояркалõн кырымпасыс — Любовь Сокерина. Старайтчõмõн кырымасьõма, гырысь шыпасьясõн. Кытысь тайõ морт йывсьыс обкомса председатель кывлис? Фамилияыс, кажитчõ, неуна тõдса. Али кодкõ мыйкõ висьталiс тайõ нывбаба йывсьыс? Фёдор Симпелев плешсõ чукрõдлõмõн недыр мõвпалыштiс, сэся дõзмис сысь, мый некыдзи дум вылас эз усь, кытысь сийõ тõдõ тайõ мортсõ, да шаркнитiс-гижис лõз карандашõн: «Õткажитны. Мед сетас заявление мõд во кежлõ».

Суйыштiс дояркалысь шыõдчõмсõ папкаас да нёдзласигтырйи чеччис. Уп, талун кежлõ удж лон эштõдõма.



СЕМÕЛЫ КОЛÕ ГÕТРАСЬНЫ

Сельпоса стõрõж Игõ Семõõс дум босьтiс гõтрасьны. Нинõм сәни тешкодьыс абу: Семõлõн гõтырыс важõн кувсьылис, а õтка мужичõй-ыдлõн олõмыд курыд. Шыд-роктõ пуны некодлы, кõлуйтõ пеславны-мыськыны бара жõ аслыд лõõ.

Медсясö, дерт, гöтрасьö сы вöсна, мый сьöлöм вылас сылы воис школаса стöрöжика Маланья. Мелі зэв дöваыс, кыз да ён, чужöмас дас чуқырысь уна абу на, дай пöжасьнытö зэв мастер. Маланьялөн шаньга-пирöгыд вомад сылöны. Сёян-сёян найöс да он вермы дугдынытö.

Коркö пырис сы ордö Семёныд, а Маланья буретш пöжасьö.

— Сёй пöсь няньсö,— шуис сійö дöвечлы да меля видзöдліс сылөн пашкыр юрси вылö.

Маланья кыскас шаньга, пуктас нянь пöв вылö, а Семён — тшавк ньылыштас. Маланья кыскас мöд шаньга. Семён бара — тшавк. Дöваыдлөн кыскавсис няньыд, бергöдчис да — нянь пöв вылас ни öти шаньга абу.

— Кыдз быттö эг и пöжасьлы,— шога шуис Маланья.

— Кыдз быттö эг и сёйлы,— долыда шуис Семён да малыштіс асьыс рушкусö. Зыкö эз воны.

Татысь тöдчö, мый налөн вöлі нин любов. Мукöд баба кö, Семётö, гашкö, бон пиняліс, а Маланья сöмын нюмъяліс. Кыдзи сэсся он гöтрась татшöм бур сьöлöма дöва вылад! Сэтшöмъястö нывбабаяс пиад зэв шоча аддзывлан...

Кывлöма Семён, мый гöтрасигөн закон серти морттö вермöны мездывны удж вылысь некымын лун кежлö. Колö öд неуна свадьбуйтышты!

Локтіс Семён Игнатъевич сельпоса председатель Долгин ёрт дінö. Долгин войбыд юöма, юрис чугун кодь сьökыд, якөр моз личкö пызан вылас.

Долгин гөрд карандашнас чукыль-мукыль визьнитіс Семёнлөн шыödчöм вылö да нурбыльтіс:

— Мун бухгалтер дінö.

Бухгалтер Клавдия Сидоровна аслас жыръяс сьökыда ышлолаліс жарысла, дугдывтөг чышкаліс мича чышьянөн еджыд нянь тупöсь кодь бандзибъяссö. Сійö чöвтліс синсö бумага вылас да нюркнитіс:

— Фёдор Алексеевичыд тай нö пасйöма сöмын «бух». Ме тэнö лэдза, а сэк кості кö складтö ректасны? Сэки код кутас öтвечайтны. Семён Игнатъевич, тэ али ме? Ог, ог ме кöйы ас вылö татшöмтор босьтны, ен мед видзас. Тöваровед, гашкö, лэдзас? Ветлы сы дінö, Семён Игнатъевич!

Томиник төваровед Эмма чуймис.

— Ме кырымала? Мыйла ме?— лэптис сійө вөс-ни синкымъяссө.— Менам делө — төвар видлавны. Гөтрасьомыд оз пыр менам функцияө.

— Коді нө, сідзкө, гөтрасьом кузяыс медся ыджыдыс?— зумыша юалис Семён.

— Гөтрасьом кузяыс — ЗАГС!— серөктис, быттьө зильөбтис эзысь колөкольчикөн Эмма.— Миян өд ещө и зам эм, ветлы, дядя, сы дінө.

Сельпоса председательлөн замыс Гуляев вөлі су-лалө аслас керка дінын да куритчө. Семёнлысь бу-мага лыддьом бөрын сійө скөрмис.

— Премия Гуляевлы абу, а виза пуктыны — Гу-ляев! Оз, Гуляев визасө оз пукты. На бөр, Семө, ас-сыд бумагатө, кытчөдз эг косявлы.

Семён тшөтш пузис.

— Гиж, колөкө, гөтрасьом вылө куим лун, а он кө, меным паныд эн лөсьөдчы! Пөвсала код юрөн!

Но Гуляев эз повзъы, виза эз и пукты. Шуис, мун пө, колөкө, кладовщик дінө, эн скөрмөдчы, бергөд-чис мышкөн да өзтис мөд чигарка.

Семён юрсө өшөдөмөн довгис корсьны кладовщик Тасяөс. Аттө, мөвпалө, вот и свадьбуйт! Аттө йөз, мортлы гөтрасьны вөля оз сетны!

Кладовщик Тася буретш вөлі томлалө пуд джынъя томанөн склад өдзөссө. Сійө кыз чунь помъ-яснас босьтис Семёнлысь бумагасө да шуис:

— Ме понда көть, Семө дядь, быд лун гөтрась. Вөч свадьбатө, эн маитчы. Миян склад бердө комын во нин ни өти шыш эз матыстчыв. Полан кө, орчча складсьыс стөрөжыс, Пронь Вань, өти сайын кы-тшовтас и таті тшөтш.

— А бумагаад эськө век жө колі пасйыны, виза али мый сійө шусьө,— корис Семён.

— Ачыл пасйы, менам чуньыс оз куснясь. Гиж: «разрешаю».

Семө гижис «разрешаю» да шавксьөдіс свадьба кежлө лөсьөдчыны. Гажаа муніс свадьбаыс. Ме сэні тшөтш вөлі, куим лун гуляйті, ус кузя визувтис дай вомө тшөтш веськалі. А складтө, дерт, некод эз вөр-зьөд. Мед не вомдзавны-а, өнія кадө юртсысянь пы-рысь шышкыд зэв нин шоч. Ёнджыка пытшкөссияныс ректөны. Но сійө нин мөд сёрни...



ВОЙСЯ ПОЛОШУЙТЧӨМ

Абу кокньыд праздник дырйи уджавны. Сапожник йөктө-гуляйтө, а пекарь пө-жасьö да мургö — оз позь сылы шомöссö энотны, аски öд ставыс кутасны нянь корны. Хрусталь кодь сөстөм синъяса довъялө милиционер. Места выла-ныс пукалөны монтер да акушерка: көть и праздник, а би вермас кусны либö выль морт свет вылас кутас вöйысьны.

Сельпоса стөрöж Рöман Иванлы быть жö лöб пост вылын сулавны. Он öд и тöдлы, пырас магази-над жулик да чышкыштас ставсö. Жуликъясыд пö радейтöны праздникяс дырйиыд ноксьыны. Рöман Иван эськö тайöс кывлис, но сельпо динь довъявны сылы, ок, и дыш вöли. Виктор зятыс, дерт, öни выль во пасйö нин. Удзöдас ещö тестьсö!

Иван дзöрис магазин кильчö дорын да мөвпалис, мый сылөн службаыс свет вылас медся омöль. Шпут-кыштіс чигаркаөн, öтарö-мөдарö видзöдліс. Шышьяс тай оз тыдавны-а, недыр кежлö кө ветлас, нинөм на оз ло. И стөрöж кутіс шавксьöдны зять керкаланьыс.

Недыр мысти сійö пукаліс нин паськыд пызан сайын. Мыйыс сэні сөмын абу! Дозмөр яй и сын черинянь, ма и шоколаднöй кампет. Зятыс радиопри-ёмниклысь вугсö бергöдлө, вомгорулас «Подмосков-ные вечера» сьылö. Сөмын дас кык час войöдз юны оз көсйы сетны. Сэтшөм пö модаыс выль вотö вич-чысигад, первой румкасö пö юлөны, кор дас кык час троньгас. Но тестьсö зятыд жалитыштіс: кисьтіс не-уна курыдтортö. Кыммөма öд пöрысь мортыс, медым неуна шоналыштö.

Иван шоналыштіс да көсйис нöшта öти румка водзджык дзайгыны, но буретш тайö кадö öдзöсті мыччысис суседкалөн детинкаыс — Мишка.

— Иван дядь,— повзьöмөн шöпнитіс сійö,— магази-над кодкö пырö.

Стөрөжлөн ыркмуни сэк съөлөмыс. Бырс уськөдчис пызан сайысь. Зятыс тшөтш повзыштис. Шөпкө тесъыслы:

— Көтөрт, кут, тэ өд стөрөжыс!

Иван пышйө туй кузя. Магазинкөд орчча керка динө матыстчис кань моз кыйкъялигтырйи. Збыльысь, кильчө вылас кодкө вуджрасьө. Кажитчис, мый гурйыв восьса нин өдзөсыс.

Стөрөжлөн паськалисны синъясыс, тирзыны кутис льөбйыс. Дерт, колө эськө сылы збоя матыстчыны да шышөс шошаөдыс кватитны, но... Уналаын мортөс «но»-ыс падмөдө... Коркө во вит либө сизим сайын Рөман Иван кывлис, өти сиктын пө стөрөжыс тадз жө кутөма шышөс. Гусясьысыс сылы сидзи чужйөма гөг вуж динас, мый стөрөжыс көть и бурдөма, но лөөма мужик нисьө баба. А Рөман Иван оз на окотит мужскөй характерсө воштыны, абу на сэтшөм пөрысь.

Стөрөж шыбитчис бөр зять ордас, том мортыс өд отсалас! Сылөн жө стenas и ружье өшалө. Пищальнад шышкысь ни ошкысь он пов.

— Тесъ, тэ ловъя?— сөмын и слөймис юавны зятыс, тесъыслөн пызь рөма чужөм вылө синсө сувтөдөмөн.

— Ловъя! Босьт пищальтө, Виктор! Көни зарадыс? Öдйө, öдйө!

Пищальсө лэдзисны матича тув вылысь, а зарадыс көни, чөрт төдө. Гашкө, гөбөчын, гашкө, чардакын. Рөман Иван кайис пөнарөн чардакө, а зятыс сартасөн лэччис гөбөчө. Час джын мысти зятыс пач костысь аддзис патронташсө. Зарадитисны пищальсө да лөсьөдчисны нин петны шыш динө, и друг пырис магазинса вузасысь Öлександра— Рөман Иванлөн нылыс. Шлюпкө-бөрдө, син дорьясыс кельчилөн кодь гөрдөсь.

— Ой, ой, магазинтө петкөдөны!— сыркъялө Öлександра.— Став төварсө нуасны!

— Эн лимзав!— скөра горөдис Иван.— Ми зятькөд өни мунам пищальөн да арестуйтам шышсө.

Öлександралөн пыр жө косьмисны синъясыс, сийө кутчысис пищаль стволө.

— Ог лэдз! Асьнытө тиянөс льяс шышкыс, асланыд пищальысь.

Рөман Иван йөткыштис сийөс, но нылыс сэтшөм

крепыда шарашитчис пищаль стволас, он тай торйод.

— Оз вины, йой! Ми кыкөнось!

— Ог лэдз! Тэ, пёрысь выжив, мун да колёко паренчаён лыйлы, а пищаль ог сет!

— Нинём оз ло пищальыд, лэдз!

Кыкнад нетшыштісны ружьесё, а Олександра аслас верёслы кутчысис морёсас да кутіс сійёс. Рёман Иванёс эськё и оз кут да сійё отнас оз лысьт муннысё. Стөрөж дзикөдз скөрмис.

— Ме,— горзё стөрөж,— вёрсё кө кута, төдан кутшөм мен лоё почёт да уважение? Комын во чөжөн өти жулик паныдасис да сійёс он лэдз кутны? А ещө нылөн лыддысян!

Нылыс ярмис жё.

— А ме,— шуё,— рад жё, мый жуликыс магазинас пырис да көсья, медым сійё удитис усйысьны! Висьтала нин ас мортлы — менам растрата лои тысяча куимсё шайт да өні ставсё көсья шыш вылас вештыны. И эн мешайтчы! Ме өд ог жё көсий судө сюрны!

Рёман Иван чуймөмөн паськөдіс синъяссё да нинём эз путьмы вочавидзны. Шеныштіс кинас да петіс. Ветла пө видзөдла магазин вылас да участкөвөйлы явита, көть ачым мед ог мыжмы.

А магазин кильчө вылын пыр на съөд морт дөввидзё. Стөрөжлөн личалі съөлөмыс. Шыш татчө эськё эз узьмөдчы, важөн нин пышйис төвар тыра нопнас. Рёман Иван полігтырйи сувтіс, шыасис ылісянь мелі гөлөсөн:

— Тянлы коді колё, төварыш?

Сьөд морт бергөдчис да шуё:

— Эн өмөй менө төд, Иван Романович?

— О, тайё тай ачыс райпотребсоюзса председатель вөлөма!— нимкодя горөдіс Иван.— Здорово, видза олан!

Киасисны. Стөрөж юалё:

— Мый нө тані сулаланнуд?

— Вои тай ревизоркөд да сійё патера корсьны довгис. Аски водз локтам ревизия вөчны, магазинсө печатайтім. Кывсьё, другө, тйан пө абу ставыс лючки-ладнө.



ЫДЖЫД НАЧАЛЬНИК

Газет редакцияын Коля Туркин вöлі медся мича мортөн. Кузь да вöсньыдик тушаа, сьöd синкымьяса, алöй бандзибьяса — дзик быттьö мича ныв.

Но Коля уджаліс тані пыр на ичöt удж вылын. Сійö материалъяссö, кодъясöс лыддьыліс да черкайтліс секретарь, Коля нуліс машинисткалы, медым сійö выльысь печатайтіс, да сы бöрын лыддис, абу-ö кытчökö суйсьöма öшыбка.

Некымын во уджаліс редакцияын Коля. Но сійö ачыс весиг чаль чунь кузя заметка на эз гижлы.

Öтчыд сійö босьтчыліс гижны дзoнь очерк. Очерк-сö вöлі заводитöма тадз: «Миян йöз радейтöны ас-сьыныс сиктсö. Кыдз сійöс он радейт, кор сулалö джуджыд кыр йылын, югыд Печоралы да шонділы воча!»

— Тöлкөн заводитöмыд, — нюмъевтіс секретарь Степан Борисович. — Кутшöм сикт нö оз сулав шонділы воча? Либö кызди тöдмавны, шонділы воча али мышкөн сулалö сиктыс?

Медым йöзыс эз гажтöмчыны очерксö лыддигөн, сійöс вöлі «ловзьöдöма» татшöм фактөн:

«Ме радейта кыйсьыны, — висьталіс миянлы колхозса передöвöй дед-новатор. — Петі öтчыд кильчö вылö, видзöда: лук град бөрöздаын ош куйлö. Водöма да певсö нёнялö. Мый нö, мися, татчö лысьтöма локны! Кутшöм смел лоöма, часлы ме тэн петкöдла пуж! Уськөдчи керкаö пишцальла. Шковги-луйи. Лэчи, видзöда: ош пыдди куйлö-червидзö аслам межöй».

Редакцияын сералыштісны тайö гижöд вылас.

Туркин лөгасис сералöмысь да сэсся некор нин эз босьтчыв гижны газетö. Код тöдас, гашкö, и вермис артмыны сысь газетчик, эз кö Колялы юрас воны мукöд сикас мөвпьяс...

Öтчыд редакцияса войтыр казялісны Коля кийсь «Сплавнöй уджъяслөн технология» нима книга.

— Он-ö нин, Николай, кылөдчысьяс вылын начальникөн көсйы лоны?— юалисны сылысь.

— А мый огыс? Начальникъясыс өд увсянь жö кыптöны,— зэв збыльысь вочавидзис Коля.— Менам юрö өд абу нитш суюлöма.

— А мастерад сэни абу кокни воөдчыны, унаысь китö ковмас гаддьöсьтлыны.

— Ме гаддьöсьсытöгыс лоа, гашкö, мастерсыс на вылынджык. Помала заочной институт и лоа мортөн,— нюмъевтис Коля.— Вот видзөдлöй. Ог жö кут ме нэмöс тиян гранкиясөн ноксыны!

Газетчикъяс юрнас сöмын довкиөдлісны. Найö некыз эз вермыны эскыны, мый Коля лоас кылөдчысөн. Коля — кылөдчысь! Кыззи нö сійö кутас кылөдчыны небыд кияснас?

Но газетчикъяс, көть и найö сюсьöсь да унатор төдмалöны водзвыв,— öшыбитчисны! Коля, вөлөмкö, збыльысь зэв сюсь, көть и кажитчис кокни мывкыда зонмөн. Во-мөд мысти сійö воши редакциясысь. Кывсис, пырöма пö совнархозö, мыйөн кө пö веськөдлө. Некод эз эскы тайö юöрыслы. Медым мыйөнкö веськөдлыны, колö, мед тэнад сы кузя и опыт, и практика вöлі. Веськөдлан кө плөтникъяс бригадаөн, колö, медым тэ ачyd төдин, мый позьö лөсавны черөн да кытчö колö, шуам, чер, а кытчö и напаръя.

И вот ме виччысьтөг аддзиси Коля Туркинкөд.

Тайö лои гажа тулысын, кор, кыззи шулöма поэт, «гөгөр жургö шор да ловзьö пулөн кор». Газетлөн пөтлытөм горшлы материал чукөртигөн ме веськалі Еджыдкыркөтшса рейдö. Юлөн рөмпöштан кодь веркөсөд нуөдөм бонаясті ветлөдлісны пельк йөз да багыръясөн небыдика тотшкөдісны гөрдов плешканыс кыз керъяслы, индалисны налы, кытчö кывтны.

Юыслысь югыд веркөссö шөралис еджыд катер. Сійö ёсь нырнас зутшкысис перилаö бонаö. Катерысь петіс руд шляпаа зон.

— Коді нин тайö воис?— юалис öти рабочейй мөдлысь.

— Кутшөмкö начальство. Аддзан, стрöга видзөдö.

Збыльысь, буракö, воöма ыджыд руководитель. Рейдса начальник Афанасий Петрович Лапин лөсьöдыштіс турунвиж гимнастёркасö, ки мышнас чышкыштіс чужөмсö да котөрөн сорөн мөдөдчис локтысь-

лы паныд. Сійö весиг сувтіс сідз жö, кыдзи салдат сувтö скөр офицер водзын, да сöмын честь эз сет.

— Привет, Афанасий!— кыліс зонлөн гөлөс, коді эз вöв зэв мелі.

— Здравствуйте, Николай Иванович!— вочавидзис рейдса начальник.

Вот коді вöлөма! Коля Туркин. Збыль öд сійö.

— Коді нö тайö локтысьыс, кöні уджалö?— юалі гусьöник рейдса техноруклысь.

— Тайö совнархозысь Туркин. Ок, и радейтö чиршöдлыны! Быд нинöм абуö кутчысьö. Воддза волігас аддзис бужöд боксыс туплясьысь ведра да дзöнь час шумитіс. А удж кузяыс нинöм оз тöд.

— Но, тадзи оз жö позь,— вочавидзи ме.— Оз кö öд нинöм тöд, руководительö эськö эз во. Аддзан, кыдз тіян начальникныд сійöс пыдди пуктö. А öд Петровичныд нэмöвöйся пöрысь сплавщик.

— Быть öд пыдди пукты. Афанасий Петрович оз радейт начальствокод лöгавны. А удж кузя сійö ачыс медся бура тöдö.

Недыр мысти кылі, кыдзи Туркин мыйыськö видіс Лапинöс. Кылісны сöмын кывъяс: «Накажита!» «Вöтлам!» «Кывзы, мый тэн висьталöны!»— да сідз водзö. Лапин кывзис мыжмöм школьник моз, синъяснас зэв тшöкыда лапйöдлігтыр, а мыйöн Туркин ланьтыштіс, кокныда ышловзьöм бöрын котөрөн сорөн кытчöкö муніс.

Ме матыстчи Туркин дорö.

— Здорово, Коля!

— Здорово,— Туркин весиг эз нюмъёвт.— Век газетугуйтан?

— Ме век газетуйта? А тэ, аддза, ыджыд мортö воöмыд.

— Назначитісны отделса замзавö. Руководита со, ветлöдла, тöлк сюя тайöяслы юраныс,— сійö шеныштіс кинас зіля уджалысь кылöдчысьяслань.— Но ме сг эшты, аддзысьлытöдз.

Туркин мыччыліс мен кисö да нетшыштіс бөр, эг и удит сійöс кутлынысö. Сійö мөдöдчис конторалань, надзөн, юрсö чатөртыштöмөн.

— Эк, тшыкөдöмаось мортсö!— жалитöмпырысь шуис рейдса технорук.— Во-мөд эськö сылы багырөн тойласьыштны колö вöлі...



ВЕМӨСӨН И ВӨТӨН

Микайлө Васильевич Тырин — зэв кыз да ён мужичёй. Видзөдлас кө стрёга лыс лап кодь синкым увсянныс — дрөж тэнө босьтас. Варовитө сэтшөм буксан да чорыд гөлөсөн, мый весиг он төд — морт тайё сёрнитө али керкалөн көрт вевт кузя gryмакылөны-ветлөдлөны.

— Прөста тэ, Мишка, тани лесопунктса контора-ас тшөтөводалан,— шулас вөлі сылы другыс, конюх Шишкин.— Татшөм статьяд важөн нин колі тэныд министрө пуксыны.

— Министрас нө туша да гөлөс серти пуктөны?— нюмъяліс Тырин.

— Дерт. Кутшөм нө министр, коді нявдакодь.

— Э-э! Юрыд кө тыртөм, пывсянөн весиг заведуйтны оз индыны.

Колины вояс, а Микайлө Васильевич, век на пукалис аслас крепыд улөс вылас. Тыдалө, вылөджыктө кыпөдчөм могысь збыльысь колө төлктө содтыны. Но өтчид профсоюзной собрание вылын, цехөвөй комитетса председательөс бөрйигөн, кодкө горөдіс:

— Тыринөс! Таысь бур начальникпусө не корсьны.

Бөрйисны Тыринөс. И сійө заводитіс петкөдлыны асьсө.

Вайисны лесопунктө лотерейной билетъяс. Звөнитлісны районсянь: колө пө өдийөджык разөдны. Тырин босьтис служащөйяслысь список, кутіс мыйкө пасьявны.

— Мый тэ гижалан, Михаил Васильевич?— юалис парторг Огибина.

— Пасьяла, коді уна-ө окотитас ньөбны. Технорук Васька Сердитовлөн удждоныс ничево, гөтыртөм на дай весиг оз куритчы,— ньөбас кызь өти шайт дон. Тшөктам!

— А главбухлы мыйла пасйин сөмын сизим шайт?

— Өти-кө, сълөн кык челядь. Мөд-кө, преферанс-сөн ворслө — содтөд рөскөд. Коймөд-кө, тошкыс сълөн зэв өдйө петө, быд лун парикмахерскөйын бритчө — бара жө деньга сы вылө колө. Сидзкө, правильнө лоө кум пөв этшаджык сылы пасйыны. Профсоюзлөн мог — ставсө артыштны да правильнөя решитны.

Огибина синва петтөдзис сералис.

— Ок тэ, Тырин, Тырин! Да өд лотерейнөй билетьяссө разөдөны добровольнө. Тэ гөгөрвоан, добровольнө! Коді мыйта окотитө, сы мында и ньөбө.

— Оз, тадзитө нинөм оз артмы, Дина Ивановна. Ме гөгөрвоа, мый добровольнө, но жмитыштны колө. Огө кө жмитыштөй, асьнымөс кутасны жмитны, планыс оз тыр да.

Но планыс тырис. Главбух ньөбис эз сизим, а кызь вит шайт дон. Технорук эз кольччы сысысь. Лотерейнөй билетьяс эз тырмыны да аслыс Михайлө Васильевичлы лои содтөд билетьясла журкнитлыны машинаөн райцентрөдз. Лотереяыд — выгөднөйтор! Лесопунктын быдөн төдісны: өти увйысысылы комын көпейкаа билет вылө уси мотоцикл.

Воис индөд котыртны профсоюзнөй самодеятельность. Михаил Васильевич бара кутчысис списокө.

— Колө сылысь, солист... Гм... Кодөс нө индам? Медся томсө кө-а, технорук Васька Сердитовөс. Гөтыртөм: некод оз кут видчыны рытьяснас дыр репетируйтчөмысь.

— Ноко, Василиса, корлы татчө техноруксө,— сетіс приказ стөрөжикалы.

Технорук воис.

— Вот мый, Сердитов ёрт,— стрөга шуис сылы Тырин.— Тэныд ковмас солиставны.

— Мый листавны?— эз гөгөрво Сердитов.

— Абу листавны, а солиставны. Гөгөрвоин? Сьывны. Самодеятельность котыртам, тэ сэн лоан главнөй соловейнас.

— Сьывны? Сералан кө-а. Эн вай, другө, тешитчы!— технорук скөрмөмысла гөрдөдіс.— Эм кө висьталанторйыд мыйкө — висьтав, а то меным колө улыс складө мунны.

— Он мун. Сьывны кутан. Прөверита, верман он. Горөд ноко «Шондібанөй!»

— Эг на йоймы да.

— Ме ог юав, йой тэ али вывті сюсь. Ме цехком-са председатель, и тэ должен кывзысьны. Он кō кут кывзысьны — ас вылад норась. Ме тэнō инді солистō. Гөгөрвоан?

— Мый тэ ме дінō сирасин?— технорук повзѳмōн видзōдліс Тырин вылō да кутчысис ѳдзѳс вугѳѳ. Сылōн юрас визьнитіс мѳвп: «Абу-ѳ нин йоймѳма Тыриныс?»

— Он мун!— горѳдіс Тырин.— Сыв ноко. Мичаа кō артмас, кутан солиставны. Сыв, тэныд шуѳны!

Раминик Сердитов тэрыба мѳвпаліс, мый вѳчны. Тойыштны да петны — Тыриныд котшкас ещѳ юр пыдѳсѳ сѳѳкыд кулакнас: синмыс мыйкѳ зэв мисьтѳма югъялѳ, гашкѳ, и вина дзурскыштѳма. Код тѳдас, мый ськѳд. Некод тай абу тані-а, чѳрт ськѳд, мед кывзѳ да ѳдйѳджык лэдзѳ тась.

— Но, мый нѳ сыла?— юаліс технорук.

—«Шондібанѳй» позьѳ.

Технорук шога горѳдіс том межлōн кодъ гѳлѳснас:

Шондібанѳй, небыд няньѳй,
Мамѳлōн пѳжалѳмѳй,
Косьтѳ менѳ, коньѳр нылѳс,
Милѳйлōн мелі кывйыс!

— Тырмас,— орѳдіс Тырин.— Пет велѳдчышт эсі-йѳ довъялысь кѳзаыслысь.

Михаил Васильевич солистѳс эз и аддзы, дѳзмис да дугдіс профсоюзнѳй самодеятельность котыртѳмысь. Комсомолецъяс ѳшѳдісны клуб стенѳ ѳъявление. Лун-мѳд мысти налōн лоины и солист, и баянист, и став мукѳд искусникыс, коді колѳ кружокъясѳ — асьныс локтісны Тыринлōн жмиттѳг.

Звѳнитлісны рабочкомсянь: путѳвка пѳ эм Ялтаѳ, нервнѳй санаторийѳ. Думыштчис Тырин. Кодѳс мѳдѳдны?

«Яков Шишкинѳс ыста. Мед пѳрысь конюх нервъясѳс лечитыштас: озджык кут вѳвъяс вылас горзыны».

Уборщица ропкигтырйи довгыліс корны Шишкинѳс. Сійѳ пырис, пѳрччис шапкасѳ, малыштіс сьѳд тошсѳ, кытысь чурвидзисны турун сіяс.

— Мый нин, Микайлѳ Васильевич, корин?— ыджыд начальниклысь моз лабутнѳя, весиг полігтыр, юаліс Шишкин.

— Вот мый, Яков. Ме тэнö кöсья мөдöдны Ялтаö.

— Коді сэні менö виччысьö!

— Эн шмонит, а то ме чöвта тэнö конюксыд да пукта... Гм-м...— Тырин эз аддзы мөд должностьсö.— Но вот, сідзкö, мунан курортö. Хвойнöй ваннаяс, пляж, море, трусика бабаяс, хе-хе!.. Босьтан путёвка дон мынтытöг.

— Ог босьт ни ог мун,— вочавидзис конюх.

— Йöймин? Ме жö тэныд сета путёвка, гөгөрвоан? Путёв-ка!

— Ёна меным колö тэнад путёвкаыд. Ме вуграсьны кöсья. Ёкыш, кельчи, ком кыскавны. А тэ Ялтаö ыстан. Ог мун!

— Мунан.

— Ог!

— Мунан!

— Ог, ог, ог мун!— горöдис конюх. Көть сійö вöлі зэв вежлив мортөн, мунигас крапнитис öдзöссö.

Михаил Васильевич зымнитис кулакнас пызанас да весиг дойдис кисö, сэссия ышловзис:

— Но и но! Нинöмөн öнiя йöзлы он угодит. Қажитчö, буртор нин вöчан, а скöралöны, öдзöстö крапйöдлöны.

Тырин рытывбыд мөвпалис, мыйла быд морт, кодос сійö корö, дöзмö сы вылö. Қажитчö, нинöм омольсö оз вöч, варовитö кызди начальник, а мыйкö быдөн лөгасьöны?

Войнас дыр эз вермы унмовсьны, думайтис, кызди колö руководитны. И бара лои сылөн сэтшöм мөвп, мый руководительлөн кыв мед вöлі чорыд. Мый шуан — закон! И ачыс сійö кывсö не должен вежны, көть и казялас, мый тэрмасигас неладнöджык шусис. А кызди нö сэссия авторитетыд лöө?

А колö войтырсö жмитны, мырдөн тшöктыны быдтор вöчны! А кызди нö жмиттöгыс? Жмитöм — колантор. Қөнтусь жмитöны — көнтусь вый артмö, шабдiс — шабдi вый. Ошкös кө жмитан — аслас чеп йылын кадриль кутас йöктыны.

Тыринлөн куньсисны синьясыс, и пыр жö заводитчис мөд олөм... Син водзас быттö сувтис стөрöжика да полiгтыр шыасис:

— Михаил Васильевич, тэнö корöны контораö.

Микайлö Васильевич öдйö пасьтасис да мунис.

Шавксьөдiс гырысь воськовъясөн. Руководство кö корö — быть тэрмась.

Контораын сылы паныд кыпöдчис кыз морт. Сийö нюмъёвтiс да торжественнöя шуис Тыринлы:

— Кыдзи стрöг руководительёс, кварталса бур итогыяс серти премируйта тэнö кöзаён!

— Кöзаён?— чуймис Тырин.

— Кöзаён. Босьт!— Кыз морт мыччис сылы гез. Гез помас вöли домалöма пань кодь югид да паськыд бугыля, чургöдöм бöжа руд кöзаёс.

— Меным оз ков. Ме кöзаястö ог радейт,— заводитлис пыксыны Михаил Васильевич, но морт стрöга букыштчис.

— Кыдзи он радейт? Мый тэныд тшöктöны, сийöс и колö радейтны. Босьт!

Михаил Васильевич повзис да нуöдiс кöзасö квартираас. Сэни кöзаыс нетшыштити вешалка вывсьыс Тыринлысь медся бур дөрöмсö да кутiс няклявны. Тырин эз удит лапнитны синнас, а кöзаыс котралiс нин öшинь улын, йирис Михаил Васильевичлысь радейтана сэтöр кустьяссö, яблоньяссö...

— Ок!— сьöкыда ружöктiс Тырин да садьмис аслас ружöктöм шыысь.

— Уф! Но и вöt!— Тырин чышкыштити кымöссьыс кöдзыд ньылöмсö.— Тадз, другö, и премия вылад он ло рад...

Позис чайтны: Михаил Васильевич гөгөрвоис — мырдöнтö весиг премия абу муса.



ПОЧЁТ ДÖСКА

Колхознöй клубөн заведуйтысь Тимопей Дуркин, тэрыб вöраса варов зон, локтiс районысь да кутiс ызгыны правлениеын, кинас и кокнас шенасьны:

— Тіян вöсна лоö быд пинялöм терпитны! Кымынысь ме тіянылы висьтавлі: колö, мися, сувтöдны пöвсö. А ті кивыль энö керлö. Вот и бара бонзытöдз критикуйтисны! Быдторйысь Тимопей мыжа.

Председатель лэптис паськыд плешсö бумагаяс весьтысь.

— Мый тэ, Тимö, лöвтан? Кутшöм пöв? Öдзöс пöвьяс ставыс местаынöсь. Нянь пöвьяс сідз жö.

— Почёт дöска, онö кө гөгөрвоий. Аддзылін, Сыктивкарад кутшöм мичаясöс сувтöдалöмаöсь? Мияны эськö сы модааöс жö вöчны.

— Колö, дерт, эськö да,— сöгласитчис ньöжмыд вöраса председатель.— Бур войтырсö некөн огö петкөдлöй, огö пöчитайтöй.

— Ме тай и шуа!

— Вот тэ, Тимопей, и босьтчы. Аслад кө оз арты, тшöкты Педöсейöс. Сійö — столояр.

Тимопей мунис Педöсей дінö. Вөлöмкö, Педöсей некор на абу аддзывлöма, кутшöм сійö почёт дöскаыс. Заводитис Тимопей висьтавлыны, весиг папирос көрöбка бокас чертёж рисуйтис.

Педöсей пельсö чошкөдöмөн кывзис-кывзис да ышловзöмөн вочавидзис:

— Немтор, пиукöй, эг гөгөрво. Видзöдлыны эськө көть син бöжөн!

Тимопей серöктис.

— Позьö, дедö! Мөдöдлам тэнö райцентрö командировкаö. Колхоз мынтыяс.

Ветліс Педöсей райцентрö. Воис да колана материалъяс бöрийö.

— Мича,— шуö,— пөвйыс сэні! Бронзаөн весиг мавтöмаöсь. А ме ещö на мичаджыкöс сөтвөрита.

Кайліс чардакас, лэччөдіс некымын кос пöв. Пöвьясыс веськыдöсь, ни öти ув абу. Печиктан да звөн кылö, көть скрипкаяс вöчав. Тайö пöвьяссö Педöсей важөн нин видзис кулігкежлас, но бур делö вылад эз жалит. Почёт дöскаыд öд абу кутшöмкө öшинь рама либö пызан, омоль материалысь сійöс он мастерит.

Дыр ноксис Педöсей. Стружитчис да тувьясис. Тимопей быд лун воывліс столяр ордö, сетліс сөветьяс. Унаысь спорö волісны. Коркө сэсся эштис жö почёт дöскаыд.

Став сиктыс видзодіс, кызди Педосей да Тимопей сувтодісны доскасö сельсовет бердö. Нинöм шуны, мича вöлі доскаыс: узора юра, гöрд лакöн краситöма. Педосей на прöщанье малыштіс доскалысь югыд бокьяссö, шмонитöмөн нисьö збыльысь шуис Тимопейлы:

— Менсым портретöс тшöтш, гашкö, öшöдан? Ме öд прамöй морт жö. Этатшöм мича пöv мастери-ті да позьö жö пöчитайтыштны!

— Öшöдам,— вочавидзис Тимопей.— Став передöвиклы öні лоö честь и слава.


Сійö жö рытнас Дуркин гижалис пöv вылас мел торйөн овьяссö зіль дояркаяслысь, кукань видзысьяслысь, порсьясöс дözьоритысьяслысь. Öні пö фото-снимокьясыс налөн абуöсь на, пока мелйөн пасйы-лам...

Коли тöлысь-мöд. Мелйөн вöчöм гижöдьяс оз нин тöдчыны. Зэрыс мыськис найöс, колины сöмын руд чукыль-мукыльяс. Почёт доска тыртöм, снимокьяс ни гижöдьяс сэні абуöсь. Тимопей Дуркин дзикöдз вунöдіс почёт доска йывсьыс, кöть эськö луннас не-кымынысь дінтіыс прöйдитлö.

Коли во-мöд. Почёт доска пöлыньтчис, лакыс сы вылысь вушйис, потласис. Тыдалö, не адзывны сы-лы некор, ни бур уджалысьяслысь снимокьяс, ни на йылысь гижöдьяс. Столяр Педосейлөн уджыс воши прöста. А жаль!

НАРОДНÖЙ СУДЬЯ СПИРИНА ЁРТЛЫ

гражданин Никита Трифонович
Сюзьпелевсьянь.



шыödчöм

Меным кывсис, мый гражданин Чижов Егор Егорович сетöма менö судö, корö менсым алимент. Онöдз алиментьяссö перйывлісны пышьялысь мужикьяслысь. Менам чуркаыс абу, выжыв Егор Чи-

жовлы мынтысьны ог жö кöсьы. Сійö абу сват ни брат. Көть и öти сиктын нэм олим, но лöсялам понаканя моз. Кöсьянныйд кө тöдны, сылөн батыс менам батылысь пельсö курччылöма, пывсянын спорö воöмаöсь да. Тайö фактыс збыль. Чижов рöд нэмсö Сюзьпелев рöд вылö пиньсö кеслö.

Егор Чижов гижöма, мый ме сійöс пельтöммöдi. Сөрö Егорыд. Ме кызди помнита, сійö век на сьöкыд пеля вöвлi. Мый вöсна, ог тöд. Гашкö, сылы пель вылас ош тувччылiс либö зонъяс тышкасигөн пель бокас сизьдыштiсны. Неважөн мекöд паныдасис видз вылын, турун вöли вайö. Ме юалi: Егор, мися, мый ваян? Сійö вочавидзис: пöкрöv лунö пö вола да кесла пилатö. Чöрт, мися, тэкöд. Ме, колökö, тэ ногыс мастерджыка кесла. А сійö шуö, эг пö ветлы песла, а ветлi турунла, он öмöй пö аддзы. Вот öд кутшöм сылөн пельыс! Свидетельясöс вайöдны, дерт, ог вермы, но тайö сёрниыс збыль вöли.

И вот тайö пельтöм гагйыс ме вылö лысьтöма норасыны, мый ме сылысь пельсö дзыкöдз бырöдi. Сöвестыс, тыдалö, мортыдлөн сöвсем абу. Ме та йылысь веськыда шуа.

Делöыс збыль вылас со кызди вöли. Мöдöдчи ме черитор кыйыштны. Веськыда висьтасы, дай участкöвöй милиционер Тетерин ёрт та йылысь дознание нуöдiс, соссьöмыд оз нин отсав. Мöдöдчи ме, сiдзкö, взрывчаткаөн чери кыйыштны. Унаөн öд тадзисö вöчöны. Пуксьыны кöсья пыжö, а тайö Егорыс и вöтчö.

— Босьт,— шуö,— менö, ме чериа местаяссö тöда, инда.

Тöдö ли оз ли, а ю дорысь Егорыд оз кайлыв, век болскöдчö. Вуграсьö да ботайтчö. Аддзис менö, вот и крукасис: горшыс сылөн паськыд.

Катим пыжнад, воим öти йирö. Егор шöпкöдö:

— Лэдз татчö взрывчаткатö. Ме кольöм во татысь пес чурка кодь сирьяс чергöдi.

Ме зарадитi взрывчатка, полiгтыр лэдзи сійöс вас. Ачым горза:

— Сын, Егор, сын

Сійö сынö... И кызд тай гымöбтiс! Син водзын ставыс вижөн-кельыдөн мунi. Пыжöй кок улысь воши. Гөгөр ваыс сюрьясөн кыптiс. Но, мися, гашкö,


ме мөдар югыдас нин да. Но вөлөмкө тайёас на. Го-
ляөдз ваын, варчча. Уп! Одва и петі берекас.

Дедыд, видзөда да, кутю моз жө ваас сёлькөдчө.
Кыски сійөс ки пөлөдыс. Спаситөмысь аттьөалөм
пыдди сійө горзыны ме вылө кутіс. Тэ вөсна пө
пельтөмми, тэ пө нарошнө взрывчаткасө пыж улас
шыбитін.

Ме, сідзкө, мыжа лои! А өд тайө, асьныд аддзан-
ныд абу правда, Мед, колөкө, правильнө сыніс дай.
Сійө, вөлөмкө, мөдарө сынөма да кылалысь взрыв-
чаткасыд эг и вермө торйөдчыны. Гашкө и взрыв-
чаткаыс пыжас крукасьлөма. Оні со корө месянь
алимент кувтөдзыс. Оз аддзыв сійө некутшөм али-
мент! Ме кора судөс өткажитны.

Тетерин ещө повзьөдлө взрывчаткаөн шыбласьө-
мысь менө судитны. А өтнам өмөй ме? Дивъя По-
мөсдінса да Печора йывса браконьерьяслы! Ме,
шудтөм мортыд, старикөс сөмын кыйи, а найө быд
бурторсө кыясны-виасны, мыйсө сөмын оз вөчны, но
некод оз аддзы. Йөра вийөны, чери кыйөны.

Ме өтнам шудтөм, өтнам мыжа.



ЗЭВ СПОКОЙНӨЙ МОРТ

арса пищекомбинатысь том
войтыр — счетовод Палкина, калькулятор Елькин да
инспектор Рогов өбедайтисны перерыв дырйи да, пөт-
төдзныс сөйөм бөрын, варовитисны асланыс выль ди-
ректор Ким Корнеевич Гурин йылысь.

— Мича да образованнөй мужчина,— шуис Пал-
кина.— Греческөй ен кодь мича!

— Вывті нин спокойнөй морт,— содтіс Володька
Елькин.— Нервьясыс сылөн көртысь. Вот эськө ме-
ным кө сэтшөм нервьяссө. Воддза директор кө вөлі
казялас, мый капустасө вывтіджык солалөмаөсь либө
ырөш шоммыштөма, сэтшөм тарарам кыпөдас, көть
удж вывсьыд пышйы выходнөй пособиетөг. А тайө —

оз! Тайо весиг и синсо оз лапнитлы. Тöрыт сизим бöчка тшыкöдöм сын чери кисьтны нуисны — и таысь сийö эз скöрмы. Шензьöдана характера морт. Пыр и аддзан, мый зэв культурной, асьсö кужö киас кутны.

— Тайо вернö, — шыасис Лёнька Рогов. — Кывлі ме, коді пö век спокойной, сийö сё арöсöдз олас. А ме вот мукöд дырйи нервничайта, ачым аслым вред вöча.

— Мыйла тэ нервничайтан, кага? — нюмялігтыр юалис Палкина.

— Кыдзи мыйла? Вот тшöктісны подписка нуöдны периодика вылö. Тэ вот эн гижсьы местной газетъяс вылад, а меным ковмас кыв кутны.

— А директор дінö ветлін? — юалис Елькин. — Гашкö, сийö кöсийö гижсьыны кутшöмкö лимита журнал вылö? Тэныд колö сылы медводз вöзйыны тайö изданиеяссö. Ми öд век эштам пыравны читальняö, а сийö пельöдзыс вöйöма уджö.

— Мыжа! — гöрдöдіс Лёнька. — Талун жö веськöда öшыбкаöс.

Директор луннас удж вылö эз волю. Медым ёнджыка петкöдлыны асьыс уважениесö аслас начальник дорö, Лёнька пырис сы ордö квартираас. Гурин эз вöв и гортас. Лёнька шыödчис сылөн гöтыр дінö:

— Пöжалуйста! Вермам гижöдны тiянöс медся сьöкыда сюрана журналъяс вылö: «Крокодил», «Здоровье», «Советской экран», «За рубежом» вылö.

— «Крокодил» миянлы оз ков! Ким Корнеевич критикьястö оз радейт. Экранъясөн огö жö интересуйтчöй. Вай рубеж йывсьыс. Гашкö, сэні заграничной модаяс эмöсь, — вочавидзис директорлөн гöтырыс. — А Ким Корнеевич оз кут видчыны? — юалис сийö повзъыштöмөн. — Сийö тэнö ме дінö ыстіс?

— Оз жö видчы! Тайö журналъяссö йöзыс корсьöны да оз аддзыны. Ким Корнеевич тэнö и менö аттьöавны кутас.

Лёнька гижис квитанция. Мöд луннас сийöс корис ас дінас директор. «Тыдалö, ачыс кöсийö менö аттьöавны», — мövпыштіс Лёнька. Кутшöма сийö чуймис, кор Ким Корнеевич скöрысь кучкис пызанас кулаканас да равöстіс:

— Коді тiянлы тшöктіс шляйтчыны йöз патераясöд? Зэв тай колöны меным тэнад журналъясыд!

Уджыс юр выв тыр, а меным, сідзкө, колө ещö жур-
налъяс лыддыны? Чайтан, меным сэсса вöчнысö
нинöм?

Повзьöм Лёнька сöмын лапйöдліс синъяснас.
И тайö директорсö найö чайтлісны зэв культурнöй да
зэв спокойнöй мортöн?!



КОЛӨ КАД ТÖДНЫ

Собрание нюжаліс. Видлаліс
нин коймöд вопрос — аския субботник йылысь. Ка-
житчö, мый колө, ставсö нин висьталіс докладчик:
босьтöй пö көрт зыръяс, гөликъяс да локтöй öкмыс
час кежлө көнтора кильчö дорö, сэсса мунамöй лөп-
өгсö весавны да канава кодйыны. Но сёрниыс кыс-
сис и кыссис.

Тайö контораас вöлі сэтшöм мода — собраниеяс
вылын сёрнитны дзик быд мортлы. Он кө выступит,
сідзкө, тэ абу прамöй морт, тэнö нинöмысь пыдди
пуктыны.

Гырысь йöз варовитісны нин: öні öта-мöд бёрся-
ыс сувтlöны посныйджыкъяс. Со нин мугов чужöма
шофёр Моторин сёрнитö:

— Ме сідзи шуа, ёртъяс, мый уличыд кө сöстöм —
сійö бур, абу кө сöстöм — сійö, ёртъяс, зэв омöль.
Мыйла, шуам, машинаяс путкыльтчывлöны? Стопка,
шуам, юан, видзöдан да, вöлі öти столб, лоис кык.
Чёртыс тöдö, кодыс и прамöйыс, а кодыс кажитчö...
Ме личнö, ёртъяс, лишнöйсö ог юлыв. Дерт, шуам, ку-
рöг и то юлө, көть сійö... Но да ладнö. Вот автокон-
тораын эм шофёр Перваков...

Моторин зільмис да, маслөöсь кинас шенасиг-
тыр, дыр висьтавліс, кызди шофёр Перваков пырав-
лöма машинанас пывсянö да садь быртöдзыс повзьö-
дöма сэнi пывсьысь старукаöс. Кывзысьяс кызöктыв-
лісны, вöрисны да исалісны нырнаныс чöскыд дуксö,

кодi локтiс улыс судтаса столөвöйысь. Обедайтан кад важөн нин коли, а собраниеыс кор на ещö помасяс.

Федот Баковлөн зэв жö ёна сюмалiс кынöмыс, но сiйö зiлис не мөвпавны борщ да калбас йылысь. Нельöд вопросы вöли сылөн, Федот Баковлөн. Талун асывнас сiйö пырис машинисткаяс дiнö, медым тöдмавны, печатайтiсны эз сылысь гижöдсö. Бумагасö Федот лун джын гижис. Тайö вöли постановлениелөн проект сы йылысь, кызди колö öшöдлыны скворечникъяс, медым скворечпиянсö эз сёйны каньяс. Федот кöсйис тайö смел проектнас петкöдлыны ассьыс инициативасö...

Машинистка, вильыша нюмъялигтыр, вочавидзис Федотлы:

— Тэнсыд постановлениетö Михаил Петрович лыддис да шуис, мый тайö пö пузчужöм кагалөн сөрöм. Ме сэсса эг и печатайт.

Федот Баков пузис, синъясыс дзирдыштлiсны чардби моз. Но гымыс эз кыв: кокни вежöра том машинистка вылö горзыны нинöмла. Федот нетшыштiс сы кийсь ассьыс гижöдсö да зумыштчöмөн гижис жалöба контораса веськöдлысьлы. Сидз пö и сидз, миян сотрудник Михаил Петрович ме вылын пö тешитчö, менсьым авторитет уськöдö, татшöм кывъяс пö лысьтöма шуны. Қора пö сувтöдны тайö важнöй вопроссö талунъя собрание вылын да мыжасö чорыда накажитны.

Жалöбасö лыддьöм бöрын контораса веськöдлысь чукыртчылiс да дыр кодь барабанитiс кузь чуньяснас пызанвывса стеклöас. Жалöба, дерт, пустяшнöй, кыз шуасны, кольк кыш дон оз сулав. Михаил Петрович справедливöя донъялöма тыртöм юра Баковлысь уджсö. Но Федот Баковкөд мый вöчан? Директор полiс Баковысь.

Директорлы дум вылас уси öти вöвлöмтор. Қоркö Федот Баковлысь удждонсьыс заводитiсны бергöдны ветымын көпейка сысысь, мый сiйö öтчыд ышмылiс да сувтöдiс кузь ныр вылас пызанвывса лампасö. Кöсйис мортыд циркачьяс моз жö кутны сiйöс сэни. Лампа швачкысис-уси да жульмунi. Олöма мортлөн татшöм вильшасьöмысь дöзмöм бухгалтер кöсйис бергöдны Федотлысь жалöваннöсьыс кöть нин

ветымын көпейка. Но эз тай удайтчы. Федот петалис ывлао да вайодис... милиционерос.

— Коді, шуан, тэнö грабитö?— стрöга юалис милиционер.

— Этайö, бухгалтерыс.

Пöрадок лöсьодысьлы висьталісны, мыйын делöыс, да сійö сералигтырйи муніс. А директор тшöктіс бухгалтерос, медым сійö пыр жö бөр сетіс Баковлы ветымын көпейкасö.

— Öдйöджык сет, öдйöджык, а то ещö прокуророс вайодас!

Öні директорлы быть лои сувтöдны Баковлысь норасьöмсö собрание вылö. Мортыс öд тшöктö. Он кө обсудит, кутас горзыны: «демократия абу», «коллегиальность бырöдöма!».

Коймöд вопрос кузя сёрни помасис. Вöлі примитöма решение: ставлы петны аски субботник вылö, босьтны көрт зыръяс да гöликъяс. За — ставыс, прöтив — абу. Воздержитчис сöмын курьер Прокопей, коді собрание чöжыс стынитіс-узис. Гölösуйтигкежлö сійöс чуксалисны, но мортыд эз и удитлы гөгөрвоны, мый йылысь муно сёрниыс.

Председатель лыддис Баковлысь жалöбасö. Федот петіс медся водзö да ыджыд гölöснас заводитіс брунгыны, кыдзи сійöс öбидитöны, кыдзи пöдтöны учреждениеын демократия.

— Машинисткалы абу тшöктöмаось менсьым гижöд печатайтны. Тайö öд позор! Позор! Кытчö ми тадзнад воам!

Пукалысьяслысь пельяссö чунöдіс Баковлөн брунган гölöсыс. Да и быдöнлөн сэтшöма сьумалис кынöмыс, мый ставныс вöліны ош кодь скөрöсь. Шутка öмöй, öд кадыс нельöд час! Председатель дзоргис тыртöм графин вылö да аддзис сы пыдди жаритöм дзодзөг яй. Секретарь мөвпалис, мый сійö регыд лэч-час столövöйö да закажитас öттшötш кык порция пельмень. «Нöшта сола öгуреч кора»,— шуис сійö аслыс. Кажитчис, мый осьса öшиньті столövöйысь нöшта ёнджыка кутіс пырны блюдояслөн чöскыд дукуыс. Тшыгмөм йöз апалисны нырнаныс дуксö да скöрысь видзöдісны ызгысь Федот Баков вылö.

— Здолой!— чеччыштлөмөн горöдіс стөрöж Мокеич.

Федот Баков быттьо виньдыліс да паськөдіс синьяссө.

— Мый здолой?— юалис сійө.

— Здолой, мися, тэнө! Кынөм гурьялө, мися!

Стөрөжлөн гөлөсыс кучкис йөзлы электрической ток моз. Ставныс шызисны, кутісны ызгыны.


Председатель заводитліс ланьтөдны йөзсө, но эз вермы.

Кыліс шофёр Моторинлөн чирөм гөлөсыс:

— Газуйтамө, ёртьяс, столөвөйө!

Шмонитіг да сералігтыр ыльөбтісны залысь. Пызан дінын колины сөмын собраниевывса председатель да Федот Баков. Председатель дивитөмөн довкнитліс юрнас.

— Эх, Федот! Мыйла нө татшөм вопроснад суйсян тшыгьялөм йөз дінас? Пөт кынөмөн кө, гашкө, и кывзисны... Колө, другө, кад төдны.



ЧЕСТНОЙ ЗОН

Валерий Вокуев любитө Эля Маеговаөс. Сылы кажитчө, мый Эляысь мичаджыкыс свет вылас оз вермы лоны, и та вөсна зэв ёна полө сійөс мырддьөмысь. Быть пов: дона нылыс өд кондукторалө автобусын, нюмьялысь зоньяс век сы гөгөр жуөны, быттьө гутьяс сакар дінын.

Веськыда кө шуны, торья мичлуныс Эялөн абу. Ныр да вом, синкым да бандзиб,— ставыс тайө, дерт, эм, но синтө ёрана мичлуныс оз тыдав. Нырыс, наперво, вывті ичөт дай неуна чангыля. А Валерий шуө, нырыс пө Эялөн настоящөй классической, медся знаменитөй киноартисткасыслөн пө сэтшөм мича нырыс некодлөн абу. Тыдалө, любовыд збыльысь неуна пөртмалө синьястө.

Любитчисны-любитчисны Валерий да Эля да мөвпыштисны гөтрасьны. Сьёлөм вылас өта-мөдныслы вооны, характеръяс бура төдмалөма, пинясьны эз на заводитлывны,— мый сэсся нөрөвитнысө? Водз чеччөмысь да водз гөтрасьөмысь пө некод на абу каитчывлөма. Дай өта-мөдныстөг овны оз вермыны. Паныдасясны да — сійө и сёрни:

— Валерий, менам тэысь кутшөма гажөй быри, дзикөдз сьёлөмөй косьмис!

— А ме войбыд тэнө вөталі!..

Сёрнитчисны өтчыд друга-пөдругаа, мый Валерий локтас Эля мамкөд төдмасьны. Сідз, пукалыштасны-варовитыштасны поводдя йылысь да мый да. Төлк кө лоас, и овмөдчөм йылысь сёрнисө гаровтасны. Дай мамыс ачыс гөгөрвоас, мый могөн сылы төдтөм зон пырөма на ордө.

Вот вөлі вөччөмыд Валерийлөн вөскресенньө асылө! Дзонь час тшапитчис рөмпөштан водзын! Гачсө утюжитөма пурт дор кодьөдз. Шөвк галстукыс кодзула небеса моз рөмнас пөртмасьө. А татшөм мича шляпанас сөмын дипломатъяс ветлөны король либө президент ордө.

Эля мам дорын ыджыд сёрни дыр эз пансы. Поводдя йылысь кузякодь варовитисны, арталісны, кор морт каяс ракетаөн төлысь вылө. Сэсся Элялөн мамыс, Христина Петровна, топөдіс би кодь гөрд вом дорьяссө да шуис Валерийлы:

— Тэ меным кажитчан. Гум кодь вөсни, бадь кодь нэриник дай баля кодь раминик. Татшөм жөник и колө Элечкалы. А көні тэ уджалан?

— Вузася,— висьталіс Валерий,— хозяйственнөй магазинын. Ті энө мыйкө думайтөй... Дерт, ме абу учөнөй либө инженер, мый сэсся вөчан. Торговля — миян рөднөй, большевистскөй делө,— висьталіс сійө дум вылас усьөм лозунг, кодөс аддзыліс торговляса работникъяслөн собрание вылысь.

— Вузасян, сідзкө? А растрата кө лоө? ОБХСС оз узь. Народнөй суд, исправительнөй колония, и Эля — дөва нисьө ныв. Ме ог вермы... Извинитөй.

Валерийлөн кутіс сырмыны кок сөныс. Откажитөны! Мый вөчны?

— Ме честнөй, растрата оз ло,— кутіс мыктавны сійө.— Куим благодарность нин сетісны. Регыд ме-

нө, гашкө, директорө пуктасны!— виччысьтөг пөръя-
лис сійө да ещө ёнджыка гөрдөдіс.— Эскөй меным,
ОБХСС вермас спокойнөя узыны, ме лектор ог вөч.

— А код төдас өнія том йөзтө? Видзөдан да быт-
тө честнөй, а збыль вылас...— Эялөн мамыс ше-
ныштіс кияснас да чеччис. Сувтіс и Валерий.

— Ме честнөй. Ме докажита!

Сійө петіс, мөдөдчис гортас. Вот и корасис! Өт-
кажитісны, янөдісны. Көть му пырыс мун. Эя —
пөслук ныв, мамыслысь ёна кывзысьө. Гусьөн Вале-
рий сайө, дерт, оз мун, нинөм и надейтчыны.

Сійө рытнас карса тротуарьяс кузя өткымын му-
нысьяс зурасьлісны зонкөд, коді, юрсө өшөдөмөн, гөр-
быльтчөмөн тэрыба вольлаліс да эз слөймыв весиг
кежны паныдасьысьясысь. Өтчид сійө зурасис кыз
нывбабакөд да сьлөн жмот уси картофель тыра сум-
каыс. Зон лэптис сумкасө кьөм вугйөдыс, извинит-
чөмөн мыччис тьөтөлы, и друг серөктіс. Скөрмөм ныв-
баба көсийс на сійөс видыштны, но зон вөлі ылын
нин. Сы вом дорын ворсіс нюмыс, синьясыс тувсов
кодзувьяс моз дзирдалісны. Сод кузя тэрыба чечча-
лігтыр зон пырис милиция отделениеө...

Мөд луннас «Пармаса ныв-зон» газетын петіс за-
метка: «ЧЕСТНОЙ МОРТ». Сэні гижөма: «Төрыт
карса милиция отделениеө локтіс том морт. Сійө
перйис зепсьыс дас шайт да шуис:

— Вот тайө деньгасө талун аддзи паркысь. Тыда-
лө, гуляйтысьяс уськөдөмаөсь. Аддзөмторсө ме коля
татчө. Коді воштіс, гашкө, волас, да сетөй сылы.

Скромнөй том морт некыз эз көсийы висьтавыны
ассьыс фамилиясө. Төдмалісны, мый сійө Валерий
Вокуев; уджалө вузасьысьөн торгын. Милицияса на-
чальник крепыда кутліс кисө честнөй зонлысь.

Ми сідз жө ошкам сійөс. Молодеч, Валерий! Тэ —
честнөй, благороднөй морт.

И. Куделин, асл. корр.».

Сійө жө рытнас Валерий Вокуев муніс Эя ордө.
Сійө перйис зепсьыс газетсө тайө заметканас да
мыччис Христина Петровналы.

— Вот, лыддьөй! Со весиг газетын гижөны, мый
ме честнөй да благороднөй морт.

Христина Петровна лэптис ныр вылас өчкисө, го-
раа лыддис заметкасө да нюмдөмөн шуис:

— Оні ме эска, мый тэ благороднӧй принц. Сідзкӧ, закажитам принцессалы свадьбуйтан еджыд платтьӧ...

Свадьба бӧрын Эля шуис аслас муса верӧслы:

— Вот эськӧ, ещӧ кӧ тэн дас шайт сюри! Менам вежӧй петӧ моднӧй туфли вылӧ.


Валерий серӧктіс да вочавидзис:

— Кӧть дас во уличясӧд кытшлав, оз сюр весиг ӧти шайт. Йӧзыд оз окотитны деньганысӧ шыблавны. А меным быть лои ассьым дас шайтӧс милицияӧ козьнавны.

ОГЛАВЛЕНИЕ

Кызди панны сѣрни	3
Марьялѳн премия	4
Медся бур приданнѳй	7
Ме да суседъяс	9
Мораль дорйысь	10
Сылысь ныв	12
Телефон дорын Катя	14
Судын	16
Выль садик	17
Тьѳтѳяс вузалісны	19
Ялавич	22
Ѳдѳття веніс	25
Урнышев лыддѳ лекция	26
Софья Фѣдоровна тшапмыліс	30
Виза	32
Семѳлы колѳ гѳтрасьны	34
Войся полошуйтчѳм	37
Ыджыд начальник	40
Вемѳсѳн и вѳтѳн	43
Почѳт дѳска	47
Народнѳй судья Спирина ѳртлы	49
Зѳв спокойнѳй морт	51
Колѳ кад тѳдны	53
Честнѳй зон	56

27496



9 кӧп.

КОМИ КНИЖНОӢ ИЗДАТЕЛЬСТВО
1964